

四庫全書

史部

欽定四庫全書

史部

山西通志卷二百二十二

詳校官給事中臣王鍾健

檢討臣德生覆勘

總校官進士臣朱鈐

校對官中書臣李斯咏

謄錄監生臣朱坦

欽定四庫全書

山西通志卷二百二十二

藝文

四十 詩二

七古

上

陶唐

神人暢

古今樂錄曰堯郊天地祭神座上有響誨堯曰水方至為害命子救之堯乃作歌謝

希逸琴論曰神人暢堯帝所作

清廟穆兮承予宗百寮肅兮于寢堂
醊禱進福求年豐

有鰥在坐敕予為客在元中欽哉昊天德不隆承命任
禹寫中宮

漢

寶鼎詩

班固

嶽修貢兮川效珍吐金景兮歆浮雲寶鼎見兮色紛緼
煥其炳兮被龍文登祖廟兮享聖神昭靈德兮彌億年
唐

汾陰行

李嶠

君不見昔日西京全盛時
汾陰后土親祭祠
齋宮宿寢設儲供
撞鐘鳴鼓樹羽旂
漢家五葉才且雄
賓延萬靈服九戎
柏梁賦詩高宴罷
詔書發駕幸河東
河東太守親掃除
奉迎至尊導鑾輿
五營夾道列容衛
三河縱觀空里閭
迴旌駐蹕降靈場
焚香奠醑邀百祥
金鼎發色正焜煌
靈祇煒熠攄景光
埋玉陳牲禮神畢
舉麾上馬乘輿出
彼汾之曲嘉可游
木蘭為楫桂為舟
棹歌微吟綵鷁浮
簫鼓哀鳴白雲秋
歡娛宴洽賜羣后
家家復除

戶牛酒聲明動天樂無有千秋萬歲南山壽自從天子
向秦闕玉輦金車不復還珠簾羽扇長寂寞鼎湖龍髯
安可攀千齡人事一朝空四海為家此路窮雄豪意氣
今何在壇場宮館盡蒿蓬路逢故老長歎息世事回環
不可測昔時青樓對歌舞今日黃埃聚荊棘山川滿目
淚沾衣富貴榮華能幾時不見祇今汾水上惟有年年
秋鴈飛

巡邊在河北作

張說

去年六月西河西今年六月北河北沙場磧路何為爾
重氣輕生知許國人生在世能幾時壯年征戰髮如絲
會待安邊報明主作頌封山也未遲

送考功武員外學士使嵩山署舍利塔

懷玉泉戀仁者寂滅真心不可見空留影塔嵩巖下寶
王四海轉千輪金曇百粒送分身山中二月娑羅會虛
唄遙遙愁思人我念過去微塵劫與子禪門同正法雖
在神仙蘭省間常持清淨蓮花葉來亦好去亦好了觀

車行馬不移常見菩提離煩惱

霍將軍

崔顥

長安甲第高入雲誰家居住霍將軍
日晚朝回擁賓從
路傍揖拜何紛紛
莫言炙手手可熱
須臾火盡灰亦滅
莫言貧賤即可欺
人生富貴自有時
一朝天子賜顏色
世上悠悠應自知

送劉四赴夏縣

李頎

九霄特立紅鸞姿
萬仞孤生玉樹枝
劉侯致身能若此

天骨自然多歎美聲名播揚二十年足下長途幾千里
舉世皆親丞相閣我心獨愛伊川水脫略勢利猶埃塵
嘯傲時人而已矣新詩數歲即文雄上書昔名蓬萊宮
明主拜官麒麟閣光車駿馬看玉童高人往來廬山遠
隱士往來張長公扶南甘蔗甜如蜜雜以荔枝龍州橘
赤縣繁詞滿劇曹白雲孤峰暉永日朝持手板望飛鳥
暮誦楞伽對空室一朝出宰汾河間明府下車人吏聞
端坐訟庭更無事開門咫尺巫咸山男耕女織蒙惠化

麥熟雉鳴長秋稼明年九府議功時五辟三徵當在茲
聞道桐鄉有遺老邑中還欲置生祠

寄王屋山人孟大融

李白

我昔東海上勞山餐紫霞親見安期公食棗大如瓜中
年謁漢主不愜還歸家朱顏謝春暉白髮見生涯所期
就金液飛步登雲車願隨夫子天壇上閑與仙人掃落
花

憶舊遊寄譙郡元參軍

憶昔洛陽董糟邱為余天津橋南造酒樓黃金白壁賈
歌笑一醉累月輕王侯海內賢豪青雲客就中與君心
莫逆迴山轉海不作難傾情倒意無所惜我向淮南攀
桂枝君留洛北愁夢思不忍別還相隨相隨迢迢訪仙
城三十六曲水迴縈一溪初入千花明萬壑度盡松風
聲銀鞍金絡倒平地漢東太守來相迎紫陽之真人邀
我吹玉笙餐霞樓上動仙樂嘈然宛似鸞鳳鳴袖長管
催欲輕舉漢中太守醉起舞手持錦袍覆我身我醉橫

眠枕其股當筵意氣凌九霄星離雨散不終朝分飛楚
關山水遙余既還山尋故巢君亦歸家渡渭橋君家嚴
君勇貔虎作尹并州遏戎虜五月相呼度太行推輪不
道羊腸苦行來北涼歲月深感君貴義輕黃金瓊杯綺
食青玉案使我醉飽無歸心時時出向城西曲晉祠流
水如碧玉浮舟弄水簫鼓鳴微波龍鱗莎草綠興來攜
妓恣經過其若楊花似雪何紅粧欲醉宜斜日百尺清
潭寫翠娥翠娥嬋娟初月輝美人更唱舞羅衣清風吹

歌入空去歌曲自繞行雲飛此時行樂難再遇西遊因
獻長楊賦北闕青雲不可期東山白首還歸去渭橋南
頭一遇君鄴臺之北又離羣問余別恨知多少落花春
幕爭紛紛言亦不可盡情亦不可極呼兒長跪緘此辭
寄君千里遙相憶

送孫徵赴雲中

韋應物

黃驄少年舞雙戟目視傍人皆辟易百戰曾誇隴上兒
一身復作雲中客寒風動地氣蒼茫橫吹先悲出塞長

敲石軍中傳夜火
斧冰河畔汲朝漿
前鋒直指陰山外
虜騎紛紛翦應碎
匈奴破盡看君歸
金印酬功如斗大
輪臺歌奉送封大夫出師西征 岑參

輪臺城頭夜吹角
輪臺城北旄頭落
羽書昨夜過渠黎
單于已在金山西
戍樓西望烟塵黑
漢兵屯在輪臺北
上將擁旄西出征
平明吹笛大軍行
四邊伐鼓雲海湧
三軍大呼陰山動
虜塞兵氣連雲屯
戰場白骨纏草根
劍河風急雲片濶
沙口石凍馬蹄脫
脫亞相勤王甘苦辛

誓將報主靜邊塵古來青史誰不見今見功名勝古人

雲中行

薛竒童

雲中小兒吹金管向晚因風一川滿塞北雲高心已悲
城南木落腸堪斷憶昔魏家都此方涼風觀前朝百王
千門曉映山川色雙闕遙連日光舉杯稱壽永相保
日夕歌鍾徹清昊將軍汗馬百戰場天子射獸五原草
寂寞金輿去不歸陵上黃塵滿路飛河邊不語傷流水
川上含情歎落暉此時獨立無所見日暮寒風吹客衣

狄明府

杜甫

梁公曾孫我姨弟不見十年官濟濟大賢之後竟陵遲
浩蕩古今同一體比看叔伯四十人有才無命百寮底
今者兄弟一百人幾人卓絕秉周禮在汝更用文章為
長兄白眉復天啟汝門請從曾翁說太后當朝多巧詆
狄公執政在末年濁河終不污清濟國嗣初將付諸武
公獨廷諍守丹陛禁中決策請房陵前朝長老皆流涕
太宗社稷一朝正漢官威儀重昭洗時危始識不世才

誰謂荼苦甘如薺汝曹又宜列土食身使門戶多旌榮
胡為漂泊岷漢間干謁王侯頗歷抵況乃山高水有波
秋風蕭蕭露泥泥虎之飢下巉嵒蛟之橫出清泚早歸
來黃土泥衣眼易眯

柳宜城鵲巢歌

并序

顧況

俗傳鵲巢在南令人貧窮多口舌東西家者已斫樹
枝公獨任其乳育於鳥如此於人可知況承命歌曰
相公宅前楊柳樹野鵲飛來復飛去東家斫樹枝西家

斫樹枝東家西家斫樹枝發遣野鵲巢何枝相君處分
留野鵲一月生得三個兒相君長命復富貴口舌貧窮
徒爾為

棲巖寺隋文帝瑪瑙盞歌

盧綸

天宮寶器隋朝物鑠在金函比金骨開函捧之光乃發
阿修羅王掌中月五雲如拳輕復濃昔曾喫酒今藏龍
規形環影相透徹亂雪繁花千萬重可憐貞質無今古
可歎隋陵一坏土宮中艷女滿宮春得親此寶能幾人

一留寒殿殿將壞唯有幽光通隙塵山中老僧眉似雪
忍死相傳保扁鐺

登天壇夜見海

李益

朝遊碧峯三十六夜上天壇月邊宿仙人攜我褰玉英
壇上夜半東方明僊鐘撞撞近海日海中離離三山出
霞梯赤城遙可分霓旌絳節倚彤雲八鸞五鳳紛在御
王母欲上朝元君羣仙指此為我說幾見塵飛滄海竭
竦身別我期丹宮空山處處遺清風九州下視杳未旦

一半浮生皆夢中始知武皇求不死去逐瀛洲羨門子

太原鄭尚書遠寄新詩走筆酬贈因代書賀

權德輿

曉開閭闔出絲言共喜全才鎮北門職重油幢推上略
榮兼革履見深恩昔歲經過同二仲登朝並命慙無用
曲臺分季奉齋祠直筆繫年陪侍從芬芳雞舌向南宮
伏奏丹墀跡又同公望數承黃紙詔虛懷自號白雲翁
戎裝蹀躞紛出祖金印煌煌寵司武時看介士閱犀渠

每狎儒生冠章甫晉祠汾水古并州千騎雙旌居上頭
新握兵符應感激遠緘詞句更風流緇衣諸侯諒稱美
白衣尚書何可比只今麟閣待丹青努力加餐報天子

長平箭頭歌

李賀

漆灰骨末丹水沙淒淒古血生銅花白翎金鏃雨中盡
直餘三脊殘狼牙我尋平原乘兩馬驛東石田蒿塢下
風長日短星蕭蕭黑旗雲溼懸空夜左魂右魄啼肌瘦
酪瓶倒盡將羊炙蟲棲鴈病蘆筍紅迴風送客吹陰火

訪古沈瀾收斷鏃折鋒赤疊曾割肉南陌東城馬上兒
勸我將金換簪竹

呂將軍歌

呂將軍騎赤兔獨攜大膽出秦門金粟堆邊哭陵樹北
方逆氣汙青天劍龍夜叫將軍閑將軍振袖揮劍鏑玉
闕朱城有門閣榼榼銀龜搖白馬傳粉女郎火旗下恒
山鐵騎請金槍遙聞箴中花箭香西郊寒蓬葉如刺皇
天新栽養神驥廐中高桁榑蹇蹄飽食青芻飲白水圓

蒼低迷蓋張地九州人事皆如此赤山秀鋌禦時英綠
眼將軍會天意

蒲關西道中作

李山甫

國東王氣凝蒲關樓臺帖出晴空間紫煙橫捧大舜廟
黃河直打中條山地鎖咽喉千古壯風傳歌吹萬家閑
來來去去身依舊未及潘年鬢已斑

首陽山

吳融

首陽山枕黃河水上有兩人曾餓死不同天下人為非

兄弟相看自為是遂令萬古識君心為臣貴義不貴身
精靈長在白雲裏應笑隨時飽死人

遠公亭牡丹

許棠

鴈門禪客吟春亭牡丹獨逞花中英雙成膩臉偎雲屏
百般姿態因風生延年不敢歌傾城朝雲暮雨愁娉婷
藥繁蟻脚粘不行甜迷蜂醉飛無聲廬山根脚含精靈
發妍吐秀叢君庭湓江太守多閑情欄朱繞絳留輕盈
潺潺綠醴當風傾平頭奴子啾銀笙紅葩豔豔交童星

左文右武憐君榮白銅鞮上慙清明

宋

絳守居園池

歐陽修

嘗聞紹述絳守居偶來覽登周四隅異哉樊子恠可吁
心欲獨出無古初窮荒搜幽入有無一語詰曲百盤紆
孰云已出不剽襲句斷欲學盤庚書荒烟古木蔚遺墟
我來嗟祇得其餘柏槐端莊偉丈夫蒼顏鬱鬱老不枯
靚容新麗一何姝清池翠蓋擁紅蕖胡鬚虎搏豈足道

記錄細碎何區區處氏八卦畫河圖禹湯臯虺暨唐虞
豈不古奧萬世摸嫉世姣巧習卑汙以奇矯薄駭羣愚
用此猶得追韓徒我思其人為躊躇作詩聊謔為坐娛

遊晉祠

歐陽修

古城南出十里間鳴渠夾路何潺潺行人望祠下馬謁
退即祠下窺水源地靈草木得餘潤鬱鬱古柏含蒼烟
并州自古事豪傑戰爭五代幾百年天開地闢真主出
猶須再駕方凱旋頑民盡遷高壘削秋草自綠埋空阡

并人昔遊晉水上清澈照耀涵朱顏晉水今入并州裏
稻花漠漠澆平田廢興彷彿無舊志氣象寂寞於山川
惟存祖宗聖功業干戈象舞被管絃我來覽登為太息
暫照白髮臨清泉烏啼人去廟門闔還有山月來娟娟

絳守居園池

梅堯臣

老栢麝不食古色浸青天沼淺龍不久秋水生浮萍屋
廬圯堊幾太守壁上彪蔚遺丹青黑石鐫辭澁如棘今
昔往來人不識酸睛欲扶無聲形既不可問不可聽懸

泉瀉竇書未停飛玉貯藍光入屏芭潭梁島甲癸丁蔓
刺交綴垂組緹蒼官扇槐翦在庭風蟲日鳥聲嚶嚶丹
葩木果粘枝藤集臺脫熟昏痾醒樊文韓詩怪若是徑
取一二傳優伶仍寄河東薛太守更與斟酌無閒局

琵琶泓

楊謨

晉城出郭十里餘嫩柳山花滿巖麓蒼苔蹭蹬步亦艱
百丈懸崖掛層屋老僧正睡門不閉習習陰風起幽谷
耳聾不聞琵琶聲但見一泓春水綠

重經車輞谷

司馬光

昔年道經車輞谷直上七里盤南坡今年行役復到此
方春汗流如翻波中途太息坐磐石涕泗不覺雙滂沱
我生微尚在邱壑強若麋鹿嬰虞羅人踰三十只有老
後時過此知如何雲泉佳處須速去登山筋力休蹉跎
苦寒行

窮冬北上太行嶺霰雪糾結風崢嶸熊潛豹伏飛鳥絕
一逕僅可通人行僮饑馬羸石磴滑戰慄流汗皆成冰

妻愁兒號強相逐萬險歷盡方到并并州從來號慘烈
今日乃信非虛名陰烟苦霧朝不散旭日不復能精明
跨鞍攬轡趨上府髮拳鬚磔指欲零炭爐炙硯湯涉筆
重複畫字終難成誰言醇醪能獨立壺腹迸裂無由傾
石脂裝火近不熱蓬勃氣入頭顱腥仰慙鴻鴈得自適
隨陽南去何溟溟又慙鴛鳥識時節巖穴足以潛微形
我來蓋欲報恩分契濶非徇利與榮古人有為知己死
只恐凍骨埋邊庭中朝故人豈念我重裘厚履飄華纓

傳聞此北更寒極不知彼民何以生

龍子祠農人享神

王士元

晉州之西山曰藐姑有泉源源流不瀦疏為八道溝與
渠坐令瘠土成膏腴多黍多稌多麻蔬沍沍萬畝碁局
如田家終歲惟勤劬雖有乾旱無憂虞割牲醑酒父老
趨坎坎擊鼓吹笙竽報答龍神醉飽餘宛若澤國江鄉
居晉州之東民豈迂耕種自亦為農夫年年汲井井欲
枯赤日炙背田不濡父子筋力疲輓轡肩頰汗浹良區

區老我見此空嗟吁誰把勞逸分兩途凶年且為寬賦租

諭學

孫復

冥觀天地何云為茫茫萬物爭蕃滋羽毛鱗介各異趣披攘攫搏紛相隨人亦其間一物耳餓食渴飲無休時苟非道義充其腹何異鳥獸安鬚眉人生在學勤始至不勤求至無由期孟軻苟況揚雄氏當時未必皆生知因其鑽仰久不已遂入聖域爭先馳既學便當窮遠大

勿事聲病淫哇辭斯文下衰吁已久勉思駕說扶顛危
擊暗毆聲明大道身與姬孔為藩籬是非豐顛若不學
慎無空使精神疲

勸學

黃 廉

河東人物氣勁豪澤州學者如牛毛大家子弟弄文墨
其次亦復誇弓刀去年校射九百人五十八人同賜袍
今年兩科取進士十子釣海登靈鼇邇來習俗益遷善
家家門戶爭相高驅兒市上買書讀寧使田間禾不薈

我因行縣飽聞見訪問終日忘勤勞
太平父老知此否
語汝聖世今難遭欲令王民盡知教
先自鄉里蒸羣髦
古云將相本無種從今著意鞭兒曹

留題洪慶觀

隔岸山如戲獅子背看松林閑掉尾
天際蒼茫落數峯
青虬下飲黃河水洪濤日夜洗崖脚
容易沙洲忽生嘴
浮嵐積靄增氣象回抱湯城來迤邐
聖世封疆屬鄉縣
令宰衙門對山起朝看片雲浮簷棟
暮雨逡巡周百里

可憐居民老蒼翠未省勞生有塵滓乘輅亦復愧斯人
特地郵亭解行李

遊萬固白石寺

程顥

條山蒼蒼河水黃中蒲形勝天下強帝得賢侯殿一方
四年不更慰民望元逢戊午季春月上心憫雨愁黎蒼
使車四百走羣望我亦奉命來侯疆精誠感格天意順
詔書纔下雨已霽病麥還青禾出土野農鼓舞歌君王
故人相見不道舊為雨歡喜殊未央聖主寬憂小臣樂

自可放蕩舒胸腸白石萬固皆勝地主人為我攜壺觴
況逢佳日俗所尚車馬未曉填康莊扶攜十里雜老幼
迤邐千騎明戈鎗初聽鳴鐃入霧靄漸見朱旆輝朝陽
遨頭自是謝康樂後乘獨慚元漫郎侯來知雖有賓客
衆喜更為將豐穰臨溪坐石徧巖谷幽處往往聞絲簧
山光似迎好客動日影定為遊人長乘高望遠興不盡
戀戀不知岐路忙人生汨沒苦百態得此樂事真難常
我辭佳境已惆悵侯亦那得久此鄉他時會合重相語

辜負泉石何能忘

首陽山行

郭士道

首陽山青龍從上聳紫蓋凌瑤空下周林壑盤蒼龍蹇
我自太古萃嶽鎮寰中黃河西來遶其下日夕雲氣開
鴻濛恍疑鬼神護又似丹青工諸峰不敢並蒼翠光玲
瓏我生癖性愛山水見此奇絕摩雙瞳忽憶武王收諸
夏夷齊叩馬來山東風雲變化適際會恥逐龍虎爭奇
功歸來守岩穴鬱鬱抱孤忠朝采山上蕨暮拾山下蓬

渴飲澗中水熱眠雲外松既不學赤松子又不侶商山
翁丹誠耿耿照白日勁節凜凜摩蒼穹首陽青青萬古
色不改夷齊之心胸直與天地相始終千載扶名教二
子功無窮我歌首陽歌未歇冷然八表生清風

子夏山

趙瞻

山因先師成令名人心仰止懸青冥文侯北面歎山扃
石室至今猶南傾直松萬林天籟聲長材大棟資連甍
溪泉四出照骨清潤物功溥民罔爭朝兮新雲澤根莖

暮兮和風發勾萌山川氣稟天地英民何知為夫子靈
魏最稱治由師經晉俗自是多諸生時尚辭華取未精
皓首學行徒修明非無神降弼王庭國朝當議平文衡
斯文未喪吾道亨商之傳授今可行

比干臺

九閭大壞一木支勢知不可誠不欺商之三仁異所歸
死諫不欲狂因為賢哉萬世忠臣師比干而已前其誰
諫不當顯何所持忠必愛君無拂辭帝舜載賡歌康隳

風雅比興陳盛衰君賢臣聖流書詩光華榮輝同歲時
扶起不欲憂顛危剖心血頸鼎鑊糜此意不獨在一時
死者一傳星日垂猶有佞人乘其機順正逢惡稱諷規
甘言好語解人頤如饕餮食角寢不背聰明蔽密鄙莫知
微干之節世亦疑章華非不窮我魏姑蘇一同宗社移
名與土滅埽無遺但為世鑒那足譏茲臺巍巍存遺基
尚覺清風洒肝脾妖狐狡兔不敢依飛沙落日予心悲

魏文侯城

曰自戰國爭雄來何城不荒為壘培治亂興廢詎足哀
矧無名號寒於灰晉壤剖裂分家陪魏至文侯功業恢
三師經術王迹開五臣禦侮強敵推況有成子相君才
吳起將兵亦偉哉內諮禮樂古典該外強師旅騰風雷
足尊天子朝靈臺烏用此城高崔嵬城之峻矣維其頽
宮之廣矣今蒿萊叅離興難悲還回如侯萬國徒塵埃
一時火熾俄燼煨惟有陋俗知營財

題介公廟

并序

張商英

介之推不忍舅犯之要君攜母以去求仁者也世傳
龍蛇章厚誣義士故有詩以辨之

十九年從晉重耳艱棘憂危同踐履田中乞食桑下謀
繭足周旋垂萬里一心奉事不自欺逆知天意開公子
及河忽聞舅犯言如以朝衣蹈泥滓鄙夫豈可與同行
攜母入山甘隱藏公子歸來霸業強築壇踐土尊天王
大夫卿士環佩鏘斬祛寺人紛頡頏念子昔者皆奔亡
舍我長逝情怛傷大蒐縱火焚山岡烈焰不肯回剛腸

嗟乎義士不可量何人謬作龍蛇章

金

田器之燕子圖并序

龐鑄

器之自叙云明昌丙辰予從軍塞外野舍荒涼難以
狀言春末有雙燕亦巢此屋土人不之識屢欲捕之
予曲為全護此燕畫出夜歸予必開戶待之忽一日
飛止坐隅都無驚畏巧語移時不去予始悟明日秋
社此鳥當歸殆留別語也因作一詩贈之云幾年塞

外歷崎危誰謂烏衣亦此飛朝向蘆陂知有為莫投
茅舍重相依君憐我處頻迎語我憶君時不掩扉明
日西風悲鼓角君應先去我何歸此詩以細字寫之
為蠟丸繫之燕足上明年四月予受代歸又八年泰
和甲子任潞州觀察判官四月十二日偶坐解舍之
含翠堂忽雙燕至一飛簷戶間一上硯屏予諦視之
繫足蠟丸故在乃知此鳥蓋往年贈詩者也因請同
年龐君才卿畫為圖求諸公賦詩

田君才畧燕雲客少年累有安邊策悔從筆硯取功名
直要橫馳沙漠北塞垣春雪白皚皚東風未放元陰開
烏衣之國定何許一雙燕子能飛來三年驛舍安西道
眼底鶯花無夢到忽見低飛入短簷此身似向邯鄲覺
君居海東我中原相逢乃在穹廬前天涯流落俱為客
感時念遠空潸然長安何限高高閣晝夜風閒開翠幕
底事猜嫌不往依甘從此地風沙惡土人嗜肉無人心
一生弋獵誇從禽有巢幸穩勿浪出汝身未必輕千金

朝來莫去益狎昵物我相忘情意一但恠重裘積漸添
元是西風催社日須知音巧惟鷓鴣忽來坐隅如告辭
我方流寓未歸得為君忍賦傷心詩詩成自述聊為戲
繫足封之亦無意燕已歸飛我未歸刁斗聲中忽驚歲
旄頭夜落妖氛收嫖姚獻凱歸神州玉闕早喜班超入
北海不聞蘇武留君才經世寧終枉幕府須賢來上黨
別後歸期兩及瓜人間秋燕十來往沈沈官舍紅芳稀
葛衣燕居澹忘機忽聞巧語入簷戶大似相識來相依

一飛簷外窺庭樹一上屏山驚不去解足分明得帛書
真是當年留別句天生萬物禽最微固耶偶耶吾不知
古道益遠交情醺朝恩莫怨雲遷移當時握手悲別離
一旦富貴棄如遺聞子燕歌應自疑慎無示之嗔我譏

保德軍中秋

蔡珪

定羌城下河南流定羌城上三層樓使君置酒勞行役
今夕何夕當中秋孤烟落日明天末洶湧碧雲俄莫合
惺惺騎馬雨中歸造物戲人無乃虐統如戍鼓方三更

夢回一室還虛明出門驚笑遽如許浮雲四卷秋天清
誰家高會塞珠箔笑語聲從雲外落倦客明朝又短亭
行人何似居人樂

題裕之家山圖

趙元

繫舟盤盤連石嶺牧馬澄澄倒山影山光水氣相混涵
中有元家舊廬井鴈門一開豺虎場駕言投迹嵩之陽
青山偃蹇不可將十年竟墮兵塵黃東巖風物知猶在
說與寄庵神已會一揮淡墨能似之清輝遠寄形骸外

元家故山吾與隣夢見不如畫圖真舊曾行處聊經眼
未得歸時亦可人

底柱圖

周昂

鬼門幽險深百篙人門逼窄逾兩牢舟人叫渡口流血
性命咫尺輕鴻毛開圖頓覺風雷怒素髮飄蕭激衰腐
河東天上石不移安得此心如底柱

游法輪院

許安仁

太行岡嶺橫漫漫撐空一帶雲霞間巨鰲背負數州出

重重山上復有山高都城頭見松嶺突兀雙峰螺髻並
招邀析城揖王屋指顧硤石瞰天井蕭蕭風葉滿山秋
巖巒掩抱雲林幽攀崖轉壑路欹側雖有佛刹誰曾游
年豐郡邑閒無事琴酒招呼二三子題詩古壁贈山僧
畧記衰翁曾到此

康澤王廟迎神送神辭

毛麾

神之來兮風雨蕭蕭不破塊兮不鳴條滋多稼兮滿平
阜享血祀兮聞歌謠神之去兮日光沉巖穴瞑兮烟雲

深廟門闔兮來棲禽空山水兮遺清音

仙雞詩并序

元德明

繁峙義興鎮酒家韓氏子畜一雞以善鬪雄其鄉一
日敵家以藥飼雞使不知痛求與韓雞對韓雞鬪久
果被傷口下頷不收垂死矣一賣藥道人過其門曰
我能活此韓欣然使療之里中諸兒隨看者一二十
輩皆使向壁立道人以雞置籠中探手良久若摩拊
然者已而取瓢水噴之置瓢籠上即出門兒曹怪其

久不還竊視之雞喙已復生矣道人布袍草冠腋下
懸青囊落魄嗜酒夜宿寺閣上韓氏子與里中人奔
走求之并所卧草薦不在矣是時明昌七年仲規弟
為此鎮酒官予亦在焉作仙雞詩以記之

老雄健鬪夸擅場韓郎抱歸神色揚豈知黠兔出微倖
毒手一廢不得妨毳毛散灑尚可養利嘴一哆何由張
青囊道人何許來自言救藥吾有方垂髯噴水濯殘血
半喙隨手生新黃筠籠半開聞膈膊草冠已往徒驚忙

神仙世有寧虛荒惜哉詭激不可量世人驚勇天且剗
沉於物也資強梁敷榮枯枿變金石未若與世鍼膏肓
何須變化示狡獪知君辨作淮南王蓬萊東望雲茫茫
愛而不見心為狂刀圭不願換凡骨且欲共醉無何鄉

絳州道中送鄉人

石玠

有淚欲不灑恐傷真性情有淚欲狂灑又非丈夫行展
轉意如何屈曲腸寸縈西山萬丈高潑潑當前迎山靈
知別難向我想慰盟吾子乃王使年質芳妙英為朝廷

耳目作稷契公卿望霖雨天下求舟楫蒼生軫車一相
遇河嶽需澄清顯親揚名事有在安內攘外責匪輕今
當此別離何足為重輕君不見大禹當年任治水八載
于外惟經營又不見班超萬里恩封侯至今邊塞咸推
稱古來賢聖盡如此丈夫勲業豈苟成俛首聞至言再
拜謝山靈感激少自奮離思即清平去去西邊深致力
期與傑士同光聲他時如負教赫赫有司盟

虞坂行

元好問

虞坂盤盤上青石石上車踪深一尺當時騏驥知奈何
千古英雄淚橫臆龍盤污泥易所歎麟出非時聖為泣
元龜竟墮余且網老鳳常饑竹花實天生神物似有意
驗以乖逢知未必若論美好是不祥正使不逢何足惜
孫陽騏驥不並有世萬億中時有一乃知此物非不逢
轅下一鳴人已識我行坂路多閱馬敢謂羣空如冀北
孫陽已矣誰汝知努力鹽車莫稱屈

并州少年行

北風動地起天際浮雲多登高一長嘯六龍忽蹉跎我
欲橫江鬪蛟鼉萬弩迸射陽侯波或當大獵燕趙間黃
熊朱豹皆遮羅男兒萬馬隨撫訶朝發細柳暮朝邯鄲
雲黑山布陽和歸來明堂見天子黃金橫帶冠我我人
生只作張騫傳介子遠勝僵死空山阿君不見并州少
年夜枕戈破屋耿耿天垂河欲眠不眠淚滂沱著鞭忽
記劉越石拔劍起舞雞鳴歌東方未明兮奈夜何

雲巖并序

觀州倅武伯英崞縣人少日舉進士有詩名其賦剪
燭刀有曉殘瘦玉蘭心吐蹴落春紅燕尾香之句甚
為時輩所稱家故饒財第宅園亭為河東之冠貯書
有萬卷樓嘉花珍果悉自他州移植為人多伎巧山
水雜畫斲琴和墨皆極其工嘗得宣和湖石一竅竅
穿漏殆若神劉鬼鑿炷香其下則烟氣四起散布槃
水上濃淡霏拂有烟江疊嶂之韻吾鄉衣冠家法書
名畫及藏書之多亦有伯英相上下者伯英獨恃寶

石以擅奇汾晉間耳興定末伯英沒於關中楊戶部叔玉購石得之壬辰圍城中以示予且命作詩危急存亡之際不暇及也乙巳冬十一月來東平過聖與張君之新軒而此石在焉聖與名之曰雲巖予問石所從來聖與言夏津王帥得之汴梁泥塗中而以見貽予因歎一物之微經歷世變遷徙南北乃復為好事者之所寶玩似不偶然乃為詩道其故聖與三世相家以文章名海內其才情風調不減前世賀東山

晏叔原故卒章以蕭間明秀峰故事屬之

壺中九華玉孌顏紫烟著水往復還小窻虛明淡相對
不數漢宮銅博山會稽禹穴深無底寶石偷來定山鬼
一堆寒碧殊不凡滿谷春雲更堪喜阿欣秀發見眉宇
小杜才情淪骨髓摩挲不作凡上看繚白紵青便千里
渾沌日鑿餘空嵌漏天蒸濕饒風嵐世外原無種香國
海南真有補陀巖觀州愛玩頓湔祓民部平生幾熏沐
藏舟夜壑未厭深竟作新軒坐中物一天星斗入金尊

翠射娉婷自有人只欠宣和鄭先覺為君留寫五湖真

天涯山

九州上游推大鹵獨恨山形頗椎魯天涯一峯今日看
快似昂頭出環堵何年氣母此融結鬼鑿神劖未奇古
八窻玲瓏透朝日洞穴慘淡藏雷雨名花錦石粲可喜
乞與雲烟相媚嫵半空擲下金芙渠想得飛來自元圃
傳聞絕頂更靈異云是清都羣玉府五雲飛步吾未能
風袂泠泠已輕舉東州死愛華不注向在陋邦何足數

敬亭不著謝宣城斷岸何緣比天姥酒船何時朝復暮
倒卷滄池浣塵土喚起山靈槌石鼓漢女湘妃出歌舞
詩狂他日笑遺山飯顆不妨嘲杜甫

蟾酥池

老藁食月飽復吐天公一目頻年瞽下界新增養蟾戶
玉府誰憐修月苦郡國蟾池知幾所碧玉清流水仙府
小蟾徐行服如鼓大蟾張頤怒於虎渠家眉間有黃乳
膏梁太子正須汝誰家敢與月復讐疾過池頭不容語

向來屬私今屬官從今見幕當好看爬沙即上青雲端
過晉陽故城書事

惠遠祠前晉溪水翠葉銀花清見底水上西山如卧屏
鬱鬱蒼蒼三百里中原北門形勢雄想見城闕雲烟中
望川亭上閱今古但有麥浪搖春風君不見繫舟山頭
龍角禿白塔一摧城覆沒薛王出降民不降屋瓦亂飛
如箭鏃汾流決入大夏門府治移著唐明村只從巨闕
失光彩河洛幾度風烟昏東闕蒼龍西白虎金雀觚稜

上雲雨不論民居與官府仙佛所廬餘百所鬼役天財
千萬古爭教一炬成焦土至今父老哭向天死恨河南
往來苦南人鬼巫好襪祥萬夫畚鍤開連岡官街十字
改丁字釘破并州渠亦亡幾時却到承平了重看官家
築晉陽

遊承天懸泉

詩人愛山愛徹骨十月東來犯冰雪懸流百里行不前
但覺飛湍醒毛髮聞聞老仙仙去久石壁姓名苔蘚滑

此翁可是六一翁
四十三年如電抹
并州之山水所湫
駭浪幾轟山石裂
只知晉陽城西天
下稀娘子關頭更
奇劖周南留滯何
敢嘆授老天教探
禹穴君不見管涔
汾源大車輪平泉
丈八玻璃盆不知
承天此水何所本
乃與沆瀣爭雄尊
平地突出隨崩奔
洶如頽波射天門
太初元氣未凝結
更欲何處留胚腴
素蚪騰擲翠蛟舞
滾滾後出皆鱣鯢
雷車怒擊冰雹散
石峽峻滑蒼烟屯
憑崖下視心魄動
自媿氣衰筆老勝
槩過眼無由吞少

東水簾亦瀟洒珠琲一一明朝瞰陽龍暗滋瑤草活鑿石自與蓮湯溫神祠水之滸儀衛盛官府頗怪祠前碑稽考失莽鹵吾聞尹革臺胎宣汾洮障大澤自是生有自來歸有所假而自經溝瀆便可尸祝之祀典紛紛果何取子胥鼓浪怒未洩精衛銜薪心獨苦楚臣有問天不酬肯以誕幻虛荒驚聾聵自有宇宙有此水此水綿綿流萬古人言主者介山氏且道未有介山之前復誰主山深地古自是有神物不假靈真誰可侮稗官小說

出閭巷社鼓村簫走翁媪當時大厯十才子爭遣李諲
饒陋語石林六月清無暑人家青紅濕窻戶射鹿有場
魚有浦好築糟臺俯洲渚甕面柳瓢挹膏乳醉扶紅袖
別吳歌風雨不憂驚妬女

閒閒公守平定以大安庚午來遊迄今壬午四十三
年矣土俗傳介子推被焚其妹介山氏恥兄要君積
薪自焚號曰妒女祠碑大厯中制官李諲所撰辭旨
殊謬至有百日積薪一日燒之之語鄉社至今以百
五日積薪而焚之
謂之祭妬女云

水簾記異

昔花絕境探未窮道人曾約山櫻紅鏡臺懸流不易得
世俗名取香爐峰七年長路今一到刺鯁欲滿平生胸
豈知早久泉脉絕快意一濯無由供神明自足還舊觀
漫浪爭敢邀靈通何因狡獪山變化勝概轉盼增清雄
天孫機絲拂夜月佛界蛛網搖秋風稱奇叫絕喜欲舞
恨不百繞青芙蓉銀橋清涼嶺玉鏡崧邱東世外果無
物邂逅乃一逢書生眼孔塞易破勺水已復誇神功東
坡撫掌應大笑不見蟄窟變魚龍

下黃榆嶺

北崖元武莫默黑如積鐵東崖劫火餘絢爛開錦纈就
中嶺頭一峰凸樸奇剝費寒雲幾千疊摩圍可望不可
到青壁無梯猿呌絕林烟日射彩翠新跬步疑有黃金
闕畫工胸次墨汁滿那得冰壺貯秋月直須潮陽老筆
迴萬牛露頂張顛揮醉帖石門細路無暗泉行人飢渴
挽不前辛苦黃榆三十里豈知却有看山緣

遊龍山

曩予寓大梁得交北州雷與劉自聞兩公跨南山每恨
南海北海風馬牛老龍面目今日始一見更信造物工
雕鏤是時山雨晴平田綠油油並山涼氣多況得通深
幽山前谷口出迎客石罅屢擊琳琅球蜿蜒入微行漸
覺藤蘿宵衣樹打頭惡木拉颰棲直幹北指稠石門無
風白日靜自是林響寒颼颼一峯忽當眼仰看看不休
一峯一峯千百峯雖欲一一顧揖知無由金城偃蹇不
得上瑤壑回合如相留苔花萬錦石丹碧爛不收天闕

守虎豹武庫開戈矛小山隨起隨偃仆獨立千仞絕頂
縹緲之飛樓百花岡頭藉草坐瀟灑正值金蓮秋亭亭
妙高臺玉斧何年修登高攬元化快如鷹脫鞢山靈故
為作開闢巧與詩境供冥搜白雲何許來纖絲弄輕柔
蓬萊作霧湧飄飄與烟浮玉衣仙人鞭素蚪翕忽變化
令人愁須臾視六合浩蕩不可求初疑陶輪比運甓今
悟夜壑真藏舟劫石拂未窮杞國浪自憂斷鼇立極萬
萬古爭遺起滅如浮漚快哉萬里風一掃天四周誰言

大始再開闢日馭本自無停輶舉手謝山靈就無清涼
毫相非神羞賤子貪名山客到已屢投黃華掛鏡臺天
壇避秦溝太山神明觀二室汗漫游胸中隱然復有此
大物便可揮斥八極隘九州玉峯有佳招絕唱須一酬
為君探囊擲下珊瑚鉤白雲相望空悠悠異時華表見
老鶴姓字莫忘元丹邱

馬嶺

仙人臺高鶴飛度錦繡堂傾去無路人言馬嶺差可行

此似黃榆猶坦步石門木落風颭颭僕夫衣單望南州
臯落東南三百里鬚毛衰颯兩年秋

元

自金山至陰山紀行

丘處機

金山東畔陰山西千岩萬壑橫深溪溪邊亂石當道卧
古今不許通輪蹄前年軍興二太子修道架橋徹溪水
今年吾道次西行車馬喧闐復經此銀山鐵壁千萬重
爭頭競角誇清雄日出下觀滄海近月明上與天河通

參天松如筆管直森森動有百餘尺萬株相倚鬱蒼蒼
一鳥不鳴空寂寂羊腸孟門壓太行比斯大略猶尋常
雙車上下苦敦擲百騎前後多驚惶天海只在山頭上
百里鏡空含萬象縣車束馬西下山四十八橋低萬丈
河南海北山無窮千變萬化規模同未若茲山太奇絕
磊落峭拔加神功我來時當八月半山已上皆為雪
山前草木暖如春山後衣衾冷如鐵

綵樓并序

李俊民

高平縣綵樓間之舊矣今始親見議者猶謂高下侈麗不及向者三分之一因感而賦之

層層華構高且崇萬綵糾纏填青紅何人下手奪天巧都入意匠經營中書契以來未省見異事驚倒百歲翁郢斤般斧莫敢近卻立屏息慙無功寒窻夏夏鳴機婦積年杼柚一日空山川謂可錦繡裹塵土盡皆羅綺封前者攀轅後者挽奔車徑欲趨靈宮三年送迎禮雖舊人事不與天時同方當炎厲行夏令權勢大抵歸祝融

神之於人無厚薄蓋以至誠能感通豚蹠豆酒道傍祝
所獲神賜亦已豐問閻疾苦還知否我為大夫歌大東
上九里谷與濟之君祥仲寬李德方朱壽之姚子

昂同遊漫興

太行巍巍形勢尊造物設險雄中原巨靈一朝辟石裂
連峰忽斷開山門侵雲直上幾千尺挂壁一徑愁攀援
十步回頭五步坐慄慄汗出如漿翻清風掖至最高頂
下視寰海塵埃昏天壇咫尺若有待顧我不往暫食言

世間好處豈不受脚力雖盡心長存為君試寫遠遊興
夜半月出清吟魂

宿仙山朝元觀題示

太行北走開四門川原落落風烟屯仙山西峙如虎踞
石嶺東抱猶龍奔道林中盤百餘畝顧揖殿寢何雄尊
仙翁得仙事惝恍碧霞洞主元元孫百年朝元去不返
寶籙秘泄風雷燉陰靈訶護石壇古老雨留漬蒼苔痕
緬懷矯矯東瀛老變化能大天溟鯢謝公本是濟時具

誰使卧老東山墩豐碑不愧蔡邕筆且拜遺像儼以溫
我來夏交樹陰翳萬橘翠瑣分蘭蓀平生素有林壑癖
苦厭闌闌埃霾昏每來福地愛瀟爽跬步乃與仙凡分
山川景氣得人勝喜對羽客開清尊夜深靜卧月東出
林影布地翻瑤琨天風吹空萬籟息明星當上手可捫
恍然人境兩奇絕月露一洗清心魂世間塵土幾千丈
有夢不到瑤臺垠人生幾何胡不樂例自跼束駒服轅
惜哉清景不可駐一聲啼鵲開林煙明朝人事隨日出

坐看蟻穴蜂衙喧

賦龍池水

即平水之源

姚樞

濁涇一斛幾半區白田一沃成膏腴汾水流源亦不殊
循崖挾阜不可渠姑射山高草木敷精英四散清流疏
清流溉田田即墾耕犍耆夫疲糞車陳蕃一室還掃除
淵明亦復新其廬伯夷柳惠聖之徒其源逼窄其流污
春日秋霜與化徂何當得此輔唐虞中行未易良可吁
晉人努力無為迂

太行望

郝經

半天遮斷連青城參差雉堞雲間橫當時十歲初度河
舟中錯愕來相迎今年恰得到蘇門百泉亭上更崢嶸
千岳萬壑入絕壁落日倒銜山盡赤玉立萬仞磔鯨牙
金翠千層擁鰲脊天沈影重看不足雲淨烟虛晚尤碧
西北兩峰寒云是雙石人不覺淚橫臆患難思二親一
從戎馬三十年桑梓慘澹埋荆榛何時突兀過絕頂拜
埽丘園見鄉井黃沙神頭間有千尺松灑盡苦淚吟長

風注目只向東海東

讀鄉先生劉景元碑

太行元氣果不死弊世有此魁傑士胸中羅列世間書
泛異窮奇無不至嘗借莊周十日還成誦未嘗遺一字
萬言默識殆片時記問區區總餘事詩文清雄簡且高
闊步不讓坡谷豪散談四座誰敢言橫膝搔吻獨滔滔
未見皆如汲冢竹劃開若若并州刀超遙孤風送行雲
爽朗夜月虛秋濤初欲有為下天井寡鶴遂抱霜毛慙

時危事去可傍人清露滿天還自警終不一到當塗門
四視俗子徒紛紛洛城西南有佳處竹間水遶梅花村
此中儘可嚼佳句笑傲煙霞有深趣著書藏山不示人
坐看石田生老樹九臯清唳誰不聞海內至今揚清芬
鄉閭晚生不及見掩淚空讀遺山文

乙亥十月往平定早發土門宿故關書所見

劉因

風烟全趙如平掌失脚山城夢猶想土門一縷漢時天

萬古行人為誰仰指似勅敵談笑中為狀羸僕忍寒強
當年鼓角如可聞急著清吟和林響遠山宛欲來相迎
近山留人屹相嚮或從井底忽登天倚伏已能先想像
平生愛山真惡識今日果為山所網昨朝爽翠擁修眉
最恨高樓負清賞壯懷鬱鬱悶欲絕安得凌風恣吾往
天教石頂放一頭駛若驂駒脫羈鞅山靈努力出奇供
只恐先生駕虛枉萬壑霜松動悲嘯極目雲烟埋缺二字
北門形勢護中原辦與英雄增技癢太行橫絕半九州

留在平原幾塵埃何人爲我起六丁嗟我盡隳天宇朗
千年再挽神禹功恍若鴻流開四象

法帖歌謝張元禮兼呈按察先生 王 惲

君不見晉人九京吾莫與天遣元精留蘭楮絳州一帖
天下奇要以鍾王爲藝祖內家中秘無雜收餉問等書
爲世取固知瓦注覩天巧虎卧龍跳照今古嗟予嗜書
昧所守集古無由似歐九玉城陸海幾燃犀下照光怪
駢萬首管窺雖得見一斑隨卽遺忘非我有承君惠此

石本佳銀字糝糊真敝帚奔蛇走虺幾千丈詭狀奇形
驚戶牖手追心摹日有得顏氏服膺承善誘明牕一日
百回看什襲深藏重瓊玖孰云好奇家四壁破屋潤餘
豐且鄣三杯適喜徑醉眠墨池濡首追狂顛覺來捉筆
便揮灑往往逸興驚蒙顓裴吳劍舞凌雲烟作詩問君
君豈然一笑乃父中令前

襄陵行

暮春庚辰日維丙駕言出遊事耕省西郊微雨半晴陰

幾點殘雲露山頂馬蹄踏破落紅香飛蓋追隨垂柳影
晉人熟食三月節店舍無烟竈厨冷春到襄陵滿縣花
綠陰池館總姚家清樽遠酌會心賞不與鶯燕爭春華
畫輪歸轅故堤沙金店西頭酒更嘉舉杯為憶劉漢事
雲龍風虎何紛拏偽淵東開蓄峻址青衣行酒真驚麝
寒帷一笑兩寂寞野老指點宮臺窪萋萋迷草碧荒城曲
依舊溪流帶北斜

又北洞

南山截然如案齊東山兩崖如抱圍洞中仙人去不返
老栢滿岩空翠微我來天氣二月初山鳥山花皆友于
野情本與樵漁熟莫遣游人避使車

平水神祠歌

陳賡

黃河如絲導崑崙萬里南下突禹門支流潛行天地底
派作八道如霆奔吾聞川嶽有真宰況乃利澤開洪源
龍神窟宅瞰平野千古廟貌何雄尊深林含蓄雷雨潤
冷殿似帶波濤痕我來南州走塵坌執熱未濯憂思煩

試斟甘冽洗肝肺
一勺注腹清且燉
悠然晞風坐東廡
倏見繪畫如飛騫
仙宮華裾乘朱軒
旗纛掩藹蛟伏轅
雷公電母踏烟霧
天吳海若驅鼉黿
何時借取霹靂手
倒挽銀漢清乾坤
廟前老翁顧我語
孺子未易排天閤
胡為高論乃如此
一笑春風滿面溫
是時三月遊人繁
男女雜遝簫鼓喧
騫菱沈玉答靈貺
割牲醢酒傳巫言
巫言恍惚廟扉闔
拜手上馬山烟昏

灤陽張節婦瓶中杏枝著花因賦
袁 楠

陶人妙合陰陽機凍壺頃刻回芳菲盈盈綠房綴冰蕊
玉蝶婀娜穿帷飛佳人蓬鬢不下堂手繡孤鳳橫匡牀
寶刀剪繪試春色翠袖慘澹顏無光烏頭可白珠九曲
造物深知憐不足故應試此一枝春點綴扶疎驚衆目
君不聞天上飄髯龍平陸成波濤又不聞壁間壺兩曜
瞬息如跳珠齊諧茫昧不可詰炯目看朱動成碧張氏
之壺如截肪真火鍊質千年剛枯根借潤表貞志慎勿
語怪歸荒唐

堯帝廟

王磐

上古元氣淳以腴羣聖既出如傳臚高辛登天帝摯庸
爰有真人起參墟黃收純衣握帝符馬如白練彤雲車
璇璣玉衡擬天樞七政循軌萬物舒耕田鑿井人自娛
帝力於我何有諸千秋萬古仰範模皎如白日臨天衢
川流山峙雨露濡聖人德澤何時枯胡南漢北聲教俱
矧茲河汾其故都邦人誇耀榮鄉閭遺廟世守無代無
遷新去故奠神居道人精誠與神孚觚稜金碧凌空虛

采椽土堦與古殊歲時香火喧笙竽神兮歸來駐鸞輿
祐我聖祚窺皇圖

李陵縣軍遇敵圖為秦孝先題 陳泰

壯哉射虎將軍孫惜哉扼虎邊軍魂旌旗半捲日光薄
風吹野水秋無言生降孰與死戰樂天子未負將軍恩
陣前八駿血為淚仰面不見咸陽門祁連山頭堆首宿
將軍多馬今何贖

乙巳清明遊青陽峽

段克己

東山氣象太猛悍萬馬駸駸來楚甸中分不肯割鴻溝
鍛礪戈矛期一戰西山折北如西漢獨餘絳灌奔而殿
誰為劉項決雌雄賴有韓彭力相援盧溝直下兩水合
泯泯暗流通一線突為瀑布出山口流沫成輪浪成漩
前逾百步落石甕黛蓄膏渟那敢眇沈沈南去若白虹
為嶼為沚互隱見鑿開渾沌幾千秋世俗雖見如不見
今人雖有筆如椽為寫佳名傳寓縣人間佳節重清明
呼兒折簡招諸彥一生能著幾兩屐佳處每欲經行遍

山靈著意勸遊人吞吐烟霞生萬變山阿玉女跪焚香
巖畔仙人一笑倩居者儼若帝王尊劍佩雍容侍閒宴
植者磊落如鉅人聚立廣庭議封禪拱者矯矯如勇夫
執戈夾祀著綦弁平灘淺瀨乍可揭溪路曲隨峰勢轉
葛屨偏宜苔蘚滑行襟時被薔薇罨當面烟嵐舞翠蛟
出岫閒雲飄素練羣行不復事拘檢眼正明時腳還倦
班荆共坐溪上石粗糲濁醪具時饌良辰無奈夕陽催
羽觴正要清歌薦醒心況復有寒泉玉池遍返成三噉

三分春色二分休
風外飛花時一片
古人行樂欲及時
半百之年猶掣電
惟有愛山綠未斷
夢寐孱顏添健羨
一窮到骨不自治
虛負胸中書萬卷
謾向山邨老却人
生來不識荊州面
肝膽槎牙須酒澆
顧我非狂亦非狷
紛紛世無真是非
棄置從渠若秋扇
歸來新月偃林梢
寂寞衡門掩深院

戊申四月遊禹門有感

黃河一線天上來
兩山突兀屏風開
天生聖人為萬世

驚濤拍案鳴春雷冷雲直上三千尺石巔古廟高崔巍
斷碑歲月不可考丹青剝落空莓苔嗟乎去古蓋已遠
荒辭漫汗相驚猜安居平土果誰力愚民耳目誠可哀
一聲漁笛起何處滄州雅興還悠哉

溪行中秋翫月

并序

薩都拉

余乃薩氏子家無田囊無儲始以進士入官為京口
錄事長南行臺辟為掾繼而御史臺奏為燕南架閣
官歲餘遷閩海廉訪知事又歲餘詔進河北廉訪經

歷皆奉其母而行以祿養也後至元三年八月望舟泊延平津是夕星河燦然天無翳雲月如白日溪聲潺湲若奏樂四山環抱如拱如立如侍左右奔走執事者薩氏子奉母坐船上與其婦具酒餚盤饌奉觴上壽繼而若妹若婿若婢若僕以次而進和而不褻謹而怡怡月色蕩酒而溪韻雜笑談母懽甚至舟人醉飲亦相與鼓枻作南歌而樂今夕何夕不知奉親之在異鄉也嗟夫昔人所謂宦遊之樂不如奉親之

樂實天樂也薩氏子於是命婦盥爵滿以酒再拜為
母壽而作歌曰

龍津秋水涵太虛今夕何夕光景殊皓月當鏡星貫珠
河漢倒影垂平蕪微波漾漾風徐徐新涼拂拂飄裙裾
阿母今年八十餘清晨理髮雲滿梳起居儼重天人如
有子在官名在儒奉母祿養南北區晨昏不忍離斯須
荆楚燕趙閩粵吳今年去官南海隅北上咫尺天子都
官船軋軋如安車阿母坐卧襟懷舒清晨夜泊不知桴

母在船上重褥鋪芙蓉映水搖氍毹開甕酒熟浮新蛆
秋園摘果雨剪蔬船尾曲突通行厨家雞水鴨美且腴
鯉鯽鮮大如江鱸奉觴酌酒前拜趨月波蕩酒如浮酥
子為母壽婦壽姑阿妹次進偕壻夫酌獻亦及婢與奴
熙熙春盎無親疏行禮有節俱歡娛阿母笑語情愉愉
有婦右策兒左扶舟人醉飽從歡呼鼓柁節歌聲鳴鳴
四山疊翠開畫圖溪瀨漱石如笙竽雙壺酒盡邨可酤
盤饌狼藉溪可漁人生此樂更有無異鄉到處同里閭

惟期母壽莊椿逾有子願學返哺烏作詩記實無浮譽
至元丁丑仲秋書

并州歌送張彥洪使畢還河東

張翥

吾鄉故人零落盡見子老成殊慰心祥金百鍊乃利器
桐尾方焦逢賞音河東臬府幕下士飛傳來作朝正使
太和嶺上盜已空旌旗盡是官車紅殺人如麻道路絕
朝狐莫梟競巢穴嚴風剽起霜倒飛塞日黯淡寒無輝
子來未幾遽言歸使我東望淚沾衣豈不聞并州少年

遊俠子手攜玉龍最輕死并州將軍劉越石夜半登臨
長歎起汾河直來繞郡城鴈門離石寒崢嶸老旻四葉
彈丸地大梁全師勞再征一朝征賊輒破碎大將不誅
天失刑為子作歌歌憤激眼中太行如動色安得壯士
射烏弓為落欃槍連太白

小隱為居延王孫德新賦

郟 韶

草堂三日風雨驚閉戶不聞車馬聲書簽頗怪燕泥濕
井屋忽看春草生王孫亦在城西住手種團團青桂樹

朝來讀書不下堂自寫淮南小山賦

禹廟詩有引

歸 暘

至正庚子暘辟地至縣縣夏都也舊隸安邑後為縣
猶以夏為名故縣有大禹廟在城西邱上暘思今天
下耕以食織以衣棟宇以息冠裳以游者微夏先王
則為魚久矣四海當通祀矧專其故都哉暘將往百
拜廟下以病不果謹為詩俟題廟壁縣人劉大有來
請刻石遂書以遺之

茫茫天壤間何處無禹迹維南瞻衡山有北見碣石東
方渤海西流沙四載所經今歷歷昔者下巢上窟昏墊
勞人如蛭蝨山如蠟齊烟不復分九點安有草木能夭
喬八年獨與鬼神語萬里乃見魚龍逃青揚充雍辨區
域漆絲締紵隨菁茅昔河東流流入海九鼎不傳皇極
在先王故國古河東巋然尚有神明宮四海魚頭萬赤
子孫孫子子如斯螽豸豈無一瓣香再拜生成功矧當昔
年三過處物不疵癘田年豐翩翩河漢霍飛龍前驅蜚

廉後豐隆男歌女舞來無窮豈不聞漢家千秋萬載隆
準公魂魄猶然思沛中

題司馬溫公墓

宋家元祐幾百年白日已墮吳山前當時中國相司馬
至今猶有兒童傳蒼生苦被青苗誤杜鵑飛向江南去
啁啾百鳥噤無聲阿閣新栽鳳凰樹山河不動風雨時
神孫大母俱無為熙寧一變如慶厯滿眼元氣春淋漓
粉旒低昂歸涑水老鵝却化千年鬼東京王氣冷如冰

五國降人作蔓子

阜山道院

張穀

仕至將相登王侯黃金積斗錢山邱朝遊繁華夕憔悴
勢利溝壑韜戈矛鄙塢金谷委陳迹古今興廢恒相侔
全真道士拋世慮瓢盂醉飽餘何求淳風化善革貪暴
無為即與松喬儔閭闔星集構棲止烟霞幻出洪崖頭
長生久視置勿究超然物外絕悔尤孤雲一片恣去留
廣輪八表恢神遊

題明月泉

李文甫

按治河汾山路遙勝跡名踪盛追考隰川北去路修回
水碧山青現靈寶嫦娥駕出桂月輪飛上巔崖照蒼昊
一泓寒水碧澄澄千丈銀蟾光皎皎瑩奪寶鑑朗空明
冷浸冰壺泛清皓悠悠物理直難明造化逞奇出天巧
冠蓋經由恣覽觀馬頭似照行人早當年隱隱春雷傳
石裂泉隳鏡未保日月飛入九霄雲澄波亦散途中潦
山中冷落車馬稀祇見石頑土空老後來賢牧重修鐫

成敗應知非偶然巨斧一揮修月手却訝冰輪飛上天
石泉明影宛如古遊人車馬復爭覩我來自謂觀民風
幾欲尋幽問修阻壁間細讀節齋詩想像幽竒冠汾潯
不徒照映賞清妍政宜寫入丹青譜

玉壁城懷古

王惲

我行河東幾欲徧大抵盤回山阜轉南崖高與北山齊
玉壁城根分一綫荒烟廢壘點坏土砲具梯衝經百戰
短碑盛說鄒君靈萬騎陰風想平甸一曲悲歌救勒川

當時神武已淒然韋公守禦儘良策更著百升飛上天
乃知誣殺咸陽日即是邕皇入鄴年

鄭君韋孝寬號有宋元祐間廟碑

絳縣吟

宋止齋

絳山青青絳水流老人元不知春秋都邑之遷由晉侯
新絳故絳皆增修東來已觀澮水洲潞公庭下曾遲留
西還直抵荀息邱爰攜詩友同追遊姜嫄庭下松陰幽
車箱故城烟草洲高人自是夷齊儔采薇一歌聲傲周
東雍龍頭西馬頭富公活民來青州自慚政拙無嘉謀

按部適至皋落陬一州六縣思分憂軍儲給散錢斯週
河南不日烟塵收普天同沐恩波優絳陽小臣無所酬
古人所有我願求以此奉職其何尤

瑞麥詩

鄭輔

絳山高原平百里亥字老人年莫記土風淳古民愈勤
鑿井耕田務農事應時霈雨足甘潤宿麥盈疇人已喜
青稍滾浪彌隴平綠葉翻花密交穗鱗鱗膏壤周數畝
一莖所出六七爾雖致闕內重兩岐豈獨漁陽雙穗美

老農自言生畎畝髮白未嘗逢此瑞愛民父母二千石
俸郡牧牧猶愷悌寬平令尹人自安餘惠所加無不至
民和政和天地和協氣薰蒸作豐歲繪圖來上駭衆目
一日歡聲流遠邇太平景況民力餘鼓腹嬉遊飽清世
和瑞麥詩

吳克禮

古絳名都盛閭里土厚民淳前史記四郊鑿井且耕田
百室勸工兼樂事不才衰晚謬分符偶值豐穰良足喜
席憲麥地二畝餘秀出莖一三五穗橫流協氣天地和

出應聖時非適爾圖形紈素上儀曹未媿來麤形頌美
兩岐而秀特為常異畝而同莫稱瑞自嗟從來昧循良
復媿臨民非愷悌日迷哀哀簿書間翻驚此物奚為至
休論千倉成有年且喜三農成樂歲遼遼堯俗幾千載
况指平陽尤密邇歡呼擊壤且興歌此時再道唐虞世
明

岷岡隱讀歌

張昌

峨嵋之岡起河東蜿蜒百里蟠蒼龍雖無峭拔巒與峰

氣勢遙接諸山雄首陽有人世隱釣築室讀書樂其樂
平生不蹈紅塵衢朝夕時與山樵俱鄉人共比伊與葛
先生默然不語諾惟將道義佩諸身摠衣子弟稱先覺
行年七十明且聰白髮似雪顏如童有時胸中吐奇秀
天葩爛漫遙光風吾亦老來歸素汾旁求同志無如君
君問高事真可尚何時細與談天人

過夫妻嶺

夫妻推車上長坂行色蒼皇日將晚巉巖石磴不可躋

夫妻相讓爭相挽力窮氣絕死道間英魂不散留空山
化為兩鳥常相偶雙飛雙宿鳴關關君不見紛紛薄俗
不古若夫妻情乖自相虐何如此嶺名不磨萬載千秋
激勸多

題太谷葡萄酒

高啟

西域幾年歸使隔漢宮遺種秋蕭瑟誰將馬乳壓瑤漿
遠餉江南渴吟客赤霞流髓濃無聲初凝豹血淋銀甕
吳都不數黃柑釀隋殿虛傳玉薤名聞道輪臺千里雪

獵騎弓強凍皆折試唱羌歌勸一觴
羶房夜半天回熱
絕味今朝喜得嘗
猶含風露萬珠香
牀頭如能有五斗
不將輕博涼州守

謁張中丞廟

延秋門上烏啼霜
猪龍曉登萐子牀
江頭老臣淚暗滴
萬乘西去關山長
公卿相率作降虜
草間拜泣如羣羊
當時不識顏平原
豈復知有張睢陽
孤城落日百戰後
瘦馬食尾人裹瘡
男兒竟為忠義死
碧血滿地嗟誰藏

賀蘭不斬上方劍英雄有恨何時忘
千年海上見祠廟
古苔叢木秋風荒
摩挲畫壁塵網裏
勇氣奕奕虬鬚張
巫歌大招客酌酒
忠魂或能來故鄉

汾河魚

謝肅

汾河魚人不識魚躍魚潛魚自得
未逐雲雷飛上天水
濶波長渺無迹寧知公子江南來
聽客劍歌聲正悲即
抱釣竿臨沮洳掣得鯉魚長尺許
碎魚為羹甘且鮮神
物儘可收饒涎嗟爾魚乎胡不掉
尾而遠逝倉卒乃為

香餌制人生出處還宜慎諸君不見汾河魚

滴水巖

唐 泰

古龍不下居山頂一蟄千年春未醒凍雲瘦削半邊峯
峯斷空分朝亦冥一夜驅風到墜淵大山小山吹將穿
入巖腹中出便去巖成窟宅老無椽開不復合年年碧
巖腹石傷石髓滴為珠為霧不可探探之真冷嘗之甘
風中殘電擊未了電丸歷亂冰光藍晶晶側挂空潭影
掃盡青山得此境道人耳無世間聲聽雨聽風耳稜冷

高闕茅庵欲近天，與龍對穴樹頭懸。
春採藥苗秋採果，為求山雨撼龍眠。
禿鬚深眉點如絮，與余語笑中無慮。
指道巖頭如此青，君今更往何方去。

故鎮行

薛瑄

北山率律界天碧，山前古景烟霞集。
兩行老木風颭颭，幾道寒泉聲瀝瀝。
溝塍繚繞禾麥稠，林果木實被道周。
人家門巷甚蕭瑟，村園水石殊清幽。
西邊梵寺臨深谷，俯視溪田藹新綠。
鐘閣風雲入壯懷，佛殿金銀炫塵目。

斷碑蒼蘚還摩挲細看歲月良已多趙宋金元迭興構
黃童白叟爭奔波誇雄競麗猶未已衰歇幾何還又起
大道由來甚坦夷何不歸斯而舍彼親朋導我村北行
叢祠戶牖餘丹青龍堂鬼物極雄怪土祠洞府何幽冥
還復崎嶇歷西澗褰衣競涉波凌亂高柳啾啾棲暮禽
平蕪渺渺語飛燕嗟哉此景良亦稀遊覽未畢情依依
念我昔年走天下每逢山水娛清輝況茲故里好林壑
有田可耕薪可斲待余他日重歸來擬卜山居尋舊約

西磴行

偶來與客遊山間地幽便覺人境偏
路入青林幾縈曲濃陰不斷風冷然
瀼瀼清泉來遠谷紺色寒瑩豁心目
石梁急瀉跳明珠草岼平流浸青綠
北行更欲尋泉源山門蓄霧勢吐吞
兩峯秀出半空裏錦屏屹立當中尊
復憩山腰小琳館洞戶雲扃殊宛轉
袖拂塵埃讀古碑茶餘苦乏青精飯
歸來白日天來中回頭尚愛千雲峯
更待秋初稍涼冷還登絕頂窺鴻濛

祭中鎮有感

徐理

天開地闢分鴻濛茲山作鎮居土中巍然自是羣嶽崇
崑崙北來勢杳窮太行西下趨關東龍翔鳳翥千萬重
維霍峻峙何其雄紛紛培塿俱相從有若父祖臨兒童
北為并冀南華嵩扶輿蟠礴疏堯封我皇御宇熙天工
民安物阜躋時雍奈何旱暵為鞠兇宸衷軫念恒冲冲
爰命臣珥奉黃琮函香不遠祠靈宮州侯縣邑致虔恭
奔走執事無惰容神庥昭於天聽聰精誠肸鬯潛相通

禮成燕享情融融振衣獨上最高峯長鑒雲表招玉龍
幹旋造化須神功願得十雨而五風載歌天保慶年豐

北臺

劉定之

白睛黑面沙陀劉乘時虎視吞九州龍牀繼拱兩父子
鳳厯才逾四春秋湘陰登樓求死所太原建廟依皇祖
髯王陣敗憤世讐獨跨黃驢泣山雨歸來撫劍自悲歌
無兒送老如愁何薛甥繼了何甥繼却向北臺降宋帝

臨清亭題壁

沈鍾

絳州城枕汾河畔四面好山青不斷分司連宿三四宵
二月春光已過半後園野鳥鳴聲諧急走開門試披玩
別有軒居三四間苔色玲瓏樹隱亂軒前鑿出兩小池
泉枯欠有波漣漪誰人好事為疏滌茲軒畢竟尤增奇
壁間舊有人題句大都只說軒之趣人空有句為軒題
軒却無言款人住倉皇走筆強續貂行李匆匆出門去
明朝曲沃盼夕陽茲軒正在烟雲處

崛巘紅葉

張頤

嵯峨萬仞峰巒紫勢聳層霄去天咫尺山僧持錫入烟霞
啼鳥樵歌四邊起商飈一夕生長空霜染楓林處處紅
粧點秋容賴青女不教人恨五更風

晉溪流水

唐叔祠前溪水碧泉湧頽波挾崖石一泓清溜瀉寒聲
千載居民仰靈澤小小渠平古殿涼西風十里稻花香
剪桐遺事今猶昨血食如何祀女郎

朔州行送王汝璧太守述職西還 程敏政

朔州城頭塞雲結朔州城下沙如雪赫連古戍白草枯
一路角聲吹不歇居民半是防秋兵十里五里屯軍營
偏師夜坐烽火息飛輓小兒歌太平王郎家世本靈武
明目張髯氣如虎羽林驕將不敢欺磧裏人畊好田土
窮州十年多苦辛奉檄東來覲紫宸長官知名聖君喜
邊吏有才能幾人遙遙朔州城勸子一卮酒馬蹄明朝
向山後女牆孤月重相思定倚危樓望南斗

高嶺歌

喬宇

榆關高嶺高接天勢控嵒嶭根盤旋石缸兩旁飛洞泉
中有蒼顏太守訪道於山巔歲時採藥耕芝田家藏異
方海上傳有時駕鹿隨雲輶角巾整服雙蹠躔瑶池萬
里咫尺邊俯視塵境心超然三十六洞趨羣仙左招安
期右偃佺奇花瑶草紛吾前再拜稱賀當壽筵只今八
表風神全方來日月不計年披圖一賦長生篇

古栢巖

殷雷忽起南山陽鬱蒸蕩盡溪風涼前村下車雨如注

親族歟我各勸觴須臾雲散晚色霽萬峰如畫森開張
沙溪無泥復命駕澗水驟添三尺強行行石龕路昏黑
篝燈前導燃松肪白楊峪西產龍馬神物化去餘空岡
不知何仙瘞兩鶴石畔頂紅雙脰長褰衣度水更東上
峻嶺細逕盤羊腸崕岬怪石巖倒立老栢秀色長青蒼
上方結屋者誰子繞棟金碧紛煒煌隙地纔容數步許
因高駕空巧莫當我初來遊歲已酉半間木屐無垣牆
懸崖題詩紀名姓石上醉墨多低昂十七年中若夢寐

撫懷舊跡增感傷情鍾棠棣既有以澤荷豐芑何能忘
呼童設榻坐兀兀今夕何夕棲禪房開門仰視斗插地
微月皎皎出東方夜深萬籟久已寂獨聞澗響聲琅琅
雲移霧轉景千變蓬萊宛在中央人間名勝信有地
雄據往往皆緇黃雲門華嶽遠難致咫尺靈境非他鄉
考槃碩人振遐躅我願招之意渺茫西林鐘磬戒明發
欲行不行歌慨慷為謝山靈勿見訝匡廬舊約吾終償

謁黃帝廟

楊一清

幽岩洞如瞰陰壑洞口飛甍架虛閣眞仙乘龍竟何在
香火千年事如昨蒙莊一言疑萬世槁死荒山凡幾輩
何殊山石老且頑我欲砭訂其能還呼兒笑折山花看
淡白長紅總自然

登黃榆嶺

梁餘之東山
南接太行

王雲鳳

厚坤忽擁太行脊上倚青天纔一尺地凝餘滓蕩水痕
我憶乾坤始開闢誰鑿萬朶玉芙蓉蒼壁丹崖太古色
雄根西與崑崙連爽氣東堪泰岳敵上有天喬之寒松

下有礪磊之怪石瀑布直下三千丈長虹偃塞明珠擲
萬壑晴見雲氣流日月時有冰花積幽龍往往澗底眠
頃刻飛去曳雲黑鳴泉汨汨出翠微一泓不動玻璃碧
絕憐赤鳥巢巖幽忽驚斑獸伏林隙層巒迴岫咫尺間
恍惚曲磴失南北仰窺嵒嶮心骨驚俯瞰砢砢毛髮立
馬蹄踟躕不敢馳聳耳長鳴如有識左右應接且徐步
一一異態看不數嗟我平生愛肥遯利名不治烟霞癖
見此喜極成踴躍安得長風駕兩腋摩挲絕頂縱雙眸

一觀方圓天地窄
巖欲付幽人居
白鶴又見飛來集
何日買田耕紫烟
間看雲霞朝復夕

送紫團山人歸山
山人能詩每夢與李白遊

紫團山湧千尋碧
處處雲霞老松柏
澗底春逢石乳垂
洞中時見仙翁奕
君能遊之不憚遠
夢中談者彷彿李
姓而名白仰攀日
月明俯瞰天地窄
樂莫樂兮茲一遊
至今瞻眺情無極
君停雕鞍我歌素
團柳線垂隄綠
桃花映水丹我歌
紫團君停雕鞍君
歸兮浩浩我愁兮
漫漫

望紫團兮曾不咫尺太行崔嵬兮羊腸艱仙翁袖有餐霞編欲往從之是何年安得與君跨兩鶴山頭長誦逍遙篇此行若見謫仙語謫仙授子以仙譜果然假寐夢青蓮恍如握手傳仙訣春鴈來時寄我書莫待長安飄素雪

太行山行

石珪

太行之山何崔嵬巖幽谷隱藏風雷漢軍已料騎士屈魏武重歎車輪推其開如陘下如井雲作炊煙瀑垂綆

羊牛只道來層霄雞犬方知接人境山僧何年住山頂
亦有山田二三頃非關避世應避名我欲從之玩流景

遊五臺感神燈示現

李師聖

梵書五頂清涼府冬永夏雪無炎暑我來七月秋正寒
何況蕭蕭岩谷雨偶爾雲開煦氣生溶溶滿目烟光聚
眞容古基鷺峰寺高山之麓雄今古西方樓觀縹緲間
粲然金碧蓮華宇懸崖峻嶺架大木神物所持憑險阻
金璫垂空殿簷響森森鐵鳳相交舞憶昔文殊出火宅

金剛寶窟通真土牽牛老人飲玉泉二子一犬隨貧女
變化無方饒益情如是西天七佛祖重聞清涼境界真
無窮陳迹書妙語我有誠心頗出羣瑞應神奇目親覩
須臾光相現咫尺玉洞金燈明可數松影搖空山谷中
夜寂太陰隱龍虎丹樓碧閣香案前敬畏生心誰敢侮
從來昏迷如夢迴前三後三慎莫取我今不作前後想
香煙稽首清涼主

登寶巖寺觀金燈

崔士榮

太行千里亘地軸隆慮西來羣峰矗峽嶺下梵宮開
景相端嚴擬天竺玲瓏亂垂如倒蓮石龕空洞似華屋
棟宇追琢皆文章千佛萬佛駭人目神工運巧如巨靈
泉水涓涓繞佛足昔聞清夜現神燈半信半疑心未服
花朝攜友一登臨詩囊酒榼隨童僕曉行紅日上高岑
俯瞰白雲滿空谷行行杖屨近青霄寥寥塵寰真一掬
半山雨落濕樵薪山上朝瞰凝樹綠來來往往人攀躋
香火朝神相陸續輓轡千尺下瓊漿岩底行人消吻酷

洞垂佛手浴清冷頂偃古松蒼蓋覆平生癖性愛煙霞
天下奇觀可稱獨夕陽對酌發高歌近夜看燈試密祝
忽然對山一星明清輝晃晃如行燭須臾數點起四山
眼底澗中五燈簇乍明乍暗焰熒熒還遠還近光煜煜
分明出現摩尼珠龍女呈來照林麓遊人大吃號佛聲
果是山靈酌我欲僧人邀我坐禪牀手捧清茶奏梵曲
細問此山開何時住持誰者留芳躅云昔修定羊上人
石窟端居虎自伏示寂一性返靈山百年遺骨香如玉

寶塔幽堂卧儼然，過客咨嗟盡肅聖境須生聖者成。
梵天魏我表亭毒，聞言不覺豎顛毛。胸中愁煩消萬斛，
禪宗我悟最上乘。覩此佛靈莫敢瀆，同行俱是青雲流。
紀勝教予書東牘，燈下走筆思若狂。漫吟只恐大家辱，
西山竒蹟滿襟懷。歸家可作卧遊錄，小窻一枕醉春風。
清夢夷游伴猿鹿。

修邊謠

尹耕

去年修邊君莫喜，血作邊牆牆下水。今年修邊君莫憂，

石作邊牆牆上頭邊牆上頭多凍雀侵曉霜明星漸落
人生誰不念妻孥畏此營門雙畫角

杏谷

何景明

東風滿山開杏花杏林十里如蒸霞武林桃源解迷客
何如種杏作生涯人家半住山霞裏滿院落花寒食雨
春香撲雪春酒酣長遣行人問山主

烏嶺堆雲

嶺樹鬱鬱雲深深青山無雨雲自陰山雲日夕千變化

青山有色雲無心
山翁久伴白雲住
家在白雲最深處
嶺頭日暮
勸雲歸破笠
輕袈衝雨去

王離城

三軍無人玉帳空
大將盡走漳河東
誰謂將軍甘楚縛
秦王白馬來關中
當年殘壘迷秋草
哀笳一聲戍烟曉
古今餘恨此銷沈
落日平蕪下山鳥

南城子歌畧

王九思

南城薛子晉之獻
南遊吳越西秦甸
江湖鷗舫汴巨濤

渥洼龍駒帶長劍對鏡漸看鶴髮生投林自覺鳥飛倦
相邀九老會耆英談仁行義鄉閭勸不學竹林曠蕩遊
仰思洛下真率宴汾水魚蝦佐酒尊行山筍蕨供殮飯
陽春白雪有謳吟明月清風無係絆

獨遊山

和順

何孟春

三黜坐直道一麾當左遷王君笏陝郡符竹勞承宣地
異長沙之卑濕路非潮陽之八千前人雅重文章守逐
客健尋山水緣美酒曲術何必惱敲門挽屋事草草潛

虬暫借尺冰居骨相難應簿書老有時按部過閬鄉秀
句滿供風月囊積翠萬尋歌馬傍仙遊誰復原軒皇寒
室中折見草樹松柏蔚茂芝蘭芳達士敦心等今古登
臨底事須吾土平生真賞寄林壑肯以粗官繼簪組春
送東風兩足閑謝公屐齒獨遊山向來蹤跡殊無端笑
倚寥廓窺塵寰百年滔滔岐路間面首冰雪凋朱顏金
石志礪固不悔江山私滯名應在一尊弔古竟屬誰蔽
芾甘棠有遺愛廊廟而今正渴賢持衣僊暑還渠輩不

才孤抱鬱憂愴靈蒙斯文任風概願子雙鳬養健翰浮
雲寧久翳長安他年會有刀頭夢飛渡羊腸百八盤

并州行送王錦夫大參

劉龍

君不見青齊千里如雲擾春燕飛來宿林杪君不見欒
槍妖氣纏嵩洛白骨堆原淚堪落西望并州阻太行農
桑在在年豐穰官遊怕涉并州道如今却說并州好憂
深思遠古唐風峻嶺崇岡作城堡男兒唾手取功名紫
綬金章致身早天將多事試斯文肯向艱危惜襟抱勸

君飲為君歌尹生保障君云何二省前時盜未起亦似
并州今可喜

佛耳山

劉麟

佛有骨亦有齒世賢不用輕相訾晉嶺蟠空天下無擇
勝呈聰露其耳當時養性悞養身宛轉形容尚孤峙佛
今已入無何有化作清風常住此聞人附語或厭凡侵
肌烈烈長風起入寺烹茶烟火生僧伽半道人羣是何
時幻質復西來共開清聽探元始

送李帥之雲中

李夢陽

黃風北來雲氣惡，雲州健兒夜吹角。
將軍按劍坐待曙，統千山搖月半落。
槽頭馬鳴士飯飽，昔無完衣今繡襖。
沙場緩轡行射雕，秋草滿地單于逃。

和沈鍾臨清亭題壁韻

林魁

溪聲忽起珊瑚畔，驟雨驚濤來不斷。
久別江南無此聲，徙倚亭橋夜將半。
勢絕殊驚海眼高，情幽飽愜詩腸玩。
鉤天鬚髯金石鳴，人世徒煩絲竹亂。
須臾聲歇成方池。

天光雲影涵漣漪天耶雲耶不復識人與景象相忘奇
書懷未合輕排句有筆難描詩外趣裴叟開莊綠野前
杜陵結屋浣花住摩詰生涯畫裏來孤鴻蹤跡風前去
更有人心不老池源頭活水當尋處

洪濟橋行

呂 枏

君不見萬泉之水水如注千巖百谷還相附波濤汹涌
勢若雷土橋木帆何為哉城西之澗衆所濟邇來崩塌
誰相繼遂令魚鼈鼓深湫坐見行人歎泛浮王侯作邑

有餘力一朝下令種民德青山鑒石碧嶙峋指日穹窿
向高旻作者不勞行者喜侯之為民何如此嗚呼我昨
買舟自京師屢更津要嗟流離侯之字民民且戴侯今
歸去甘棠在請君欲盡侯之功太行之石還可礪

琴高圖為李勲衛賦

徐渭

天上神僊塞紫虛人間毛穎不勝書乍聞弄玉騎青鳳
又見琴高跨赤魚千年古素粘蝴蝶蒼濤高處擎紅頰
不知儂是畫中人欲請波臣後鱗鬣

歌送董僉事之大同

王世貞

盤雕錦袍鐵驕驄繡旗雙颭桃花紅董家南塘聊一出
萬舸不敢乘春風健兒百戰髓力盡天子高卧咸陽宮
撫髀之對何匆匆誰奪我公向雲中南粵王頭闕下矣
六羸北首穹廬空代人巷賀吳人哭安得分身來救儂
劍歌大白須滿飲天下健者唯董公嗚呼天下健者唯
董公

過長平

世間怪事那有此四十萬人同日死白骨高於太行雪
血飛迸作汾流紫銳頭豎子何足云汝曹自死平原君
烏鴟飽宿鬼車痛至今此地多愁雲耕農往往誇遺跡
戰鏃千年土花碧即令方朔澆豈散總有巫咸招不得
君不見新安一夜秦人愁二十萬鬼聲啾啾郭開賣趙
趙高出秦壘也送東諸侯

淮陰侯廟歌

咸陽傾城葬祖龍嬪嬙掩泣千花紅十二金人銷不盡

揭竿斬木飄於風是時韓生業釣者其志固已無山東
轅門執戟重瞳子已蜀為壇隆準公白帝雄圖久成滅
烏江獨馬非為功歸來故鄉高築宮黃金如山一日空
齊趙諸侯在指掌俛仰宇內無英雄三奪軍權再被縛
束手不待如發蒙迺知天授豈人力代相之約何匆匆
當時幸不烹蒯通嗚呼餘子馬足數往往鐵炭埋膏斧
驪山刑客布乎王長安徹侯噲等伍微時猶營萬家墓
貴日翻慳一坏土尚令黃河羞漢帶日夜崩濤奪鉦鼓

乍可吾徒設辦香莫令兒輩陳牲醑荒堦突兀見老檜
乾坤熒熒日漸吐五陵王氣橫亘天亦復寂寞成今古

送王給事使潞

李攀龍

憶昔邊塵暗薊門六軍如雲集闕下天子授鉞臨軒檻
宜陽王公其人者風流舊出城朔方簡在新除大司馬
是時將帥竇跋扈傾耳履聲入北斗引經答詔動稱意
草檄提兵常在手帝力自堪制閭外股肱佐命吾何有
一從誅亂朝廷清四海亦重尚書名看君少年青瑣客

漢家今得韋元成袖裏彈章百不避囊中諫疏垂欲行
主恩三晉持節使上黨諸侯帶礪功泛槎春度濁漳水
設醴夜宴虎祁宮歸來煉石補造化論思廷諍才何雄

朝陽閣行

王世隆

壽陽城東有高閣正德之年富民作飛甍碧瓦耀晴空
嵌壁金身動朱箔崔嵬似出鬼工手靡麗疑從玉宸落
我行過此慨嘆生豈為登臨心眼豁城中闌闌數百家
半愁風雨半塵沙青衿士子無處所孔壁傾頽生土花

富民有錢不辨此祇為浮屠作盟主閤成富民亦且死
福田利益竟何許錢多未必是天生巧求虐取空四隣
四隣空虛富乃成指困積米囊積金守財不舍將奈何
百年逝水無停波富民無子錢空多日暮途遠思維摩
豈知維摩號慈雲濟世還欲捐此身塗膏藥血鬼不享
維摩豈肯傷衆生亦知冥報理不舛悖入悖出鑒非遠
人情翻覆似波瀾天道倚伏幽且險君不見長安城中
寺萬重鉅麗無比元明宮宮成怨積禍機發至今未泰

悲秋風樵夫牧兒戰手罵豈有福澤遺沙蟲冥頑不悟
殊已矣我作歌行訓諸士縣官循良博士美聞予之言
大歡喜一拳槌碎此閣勿再起免惑愚民訪問里我聞
其言為且止莫若因之示條理昌黎此地有遺烈改作
祠堂未為靡勸分亦可代逋負葺屋或堪容士子如此
處置有深意標得明明正綱紀大書予言表閣門父老
應當傳世世

公濟橋行

張相

公濟橋上石為棧公濟橋下水澄練憶昔兩山水橫流
直射西山噴羽箭萬牛不挽千山摧霧雨冥冥走郊甸
巨靈鬼斧破洞雲五丁神力開巨堰取出怪石砥柱材
撐起西北天半面吸月元犀岸上蹲浴日青龍水中見
雙虹背引碧漢通六鼇簪聳皇輿奠為問神功誰能爾
云是公濟王柱史君不見汾川移官白彭蠡橋上行人
誦秋水

石塘白雲洞

張慎言

長溪泊水交潺湲層疊轉岫泛崇巖川谷徑復不可度
容裔偕雲與間闊薄寒中人暎始煜荏苒雲華稠可翳
不知羽化者阿誰深鎖雲霞滿石屋撥雲入屋搜雲根
其中乃有靈蛻存灣環窈窕不敢進噴薄森沈若吐吞
元氣淋漓半作水漱之清冽甘如醴胸懷落落不可名
人能餌之長不死半始英英流層阿潏灩蔥蘢相戛摩
俄看繚繞搏羊角迴翔仍復綠文波恍忽沈吟我良久
乃悟非無亦非有不知此雲生於空又復非空生谷口

我攜我友字子丹其人綽約癯且寒手劖雲根置懷袖
云可鬻熟充朝餐

登香山

王濬初

夏屋山中青玉案三峰卓筆凌霄漢石壺寒水澹不流
蘸入三峰清可玩仙人駕鶴來臨池幻出天章世外奇
早被五丁收拾去至今騷客不題詩

龍泉行

文翔鳳

險乃在瀟澤之西芹池之東只緣誤立陽城縣置之干

山萬山中遂開一坂衝雲出影垂長壑半足虹使我心
悸骨寒三數載夢魂戰析城擁紫御青之二百重此行
手縮文章璽選僊使者下高穹九約更掃青蘿逕無夷
新鞭白鬚龍徑度媧皇補天石側凌后羿射日峰緣溪
曲撥殘霞入謖謖耳根快送風巖壁或懸六七寺澗石
頻挂兩三松羊腸盤處天如帶豕腹脹時水似弓山鳴
空應鑼聲迅早已傳他寶地鐘數僧弄管來林杪林中
水嘯玉瓏鬆從官安勅蓮花座行吏開筵兜率墉筋破

團搶雲脚綠案斜琥珀酸光紅畦帶萱花新發蒂旋來
采采入清供一枕琅玕明月老諸天掖下裂空濛定雲
更起客初寤先問夜來水所窮武陵源上尋桃片蒼龍
溪畔探新宮少霞筆力題軒轍道真蹤跡誌流溶濯纓
手堪攜孺子洗耳瓢不棄巢翁忘却頭顱冠獬豸但知
薜荔藉芎藭錐卓浮圖刹天立倚欄六界落心胸百磴
虛無輕挾羽一梯縹緲倦拈筇曲折山坳停褐蓋扶疎
柳頸擊青驄安得幽人函玉訊一一與之裸石淙光陰

信道山中緩桐栢金庭尚待儂堂前且厭春風帳門外
爭排舞雩童我還自道諧仙骨人浪相看擬聖宗行行
探騎來天黨鶴唳猿慙惜大雄未是風塵應償債總因
根器有圓功坐三壺兮望八鴻我所思兮海雲所捧開
幔之芙蓉尚恐他時更署南宮長勞勞蕊榜又題封不
放十大洞天深處去海山院裏爾曹尤自想清丰寂寞
青牛白鹿背仇六稚川杳莫通我將何以謝韓衆與鳶
洪

鹽車行

文翔鳳

鹽井解州大利權阻修只恨太行山誰牽代北拳毛錦
濫厠蹇蹄共阜閑鹽車飛軌薄其領羊腸縛却追風影
伯樂下車攀哭之驥亦噴鳴為引頸滿身悉辨五花雲
拂拭漉汗赤鬣整試捷先周地一迴繞日三匝漢關開
庸人止解觀牝牡願君槌碎千金臺

羊腸坂

既出井中天旋向腸中盤碾子谷往且復磨盤寨環而

曲不堪牛難又巒層欲脫馬牢翻澗複自朝直至日中
災周遭只在山之腹

翠微仙洞

陳霆

青天白日騰祥雲天風翼翼吹飛輪海天從許叱霞馭
塵世那復遺仙裙從來純孝感天帝帝遣西池列名位
何年來看唐昌花却道雲輶玉峰去

太行山

陳弘度

巍巍大形山高與天齊俯視培塿但亦爾爾疊翠嶂兮

千峰延繇亘兮萬里斗折峯律修塗礪礪勁風驅雲根
遠岫沒山嘴林端落葉鳴木末高鳥起石稜稜巖齒齒
今人古人亦已矣客徘徊其間極目天際但見長河送
流水

武侯廟

王元粹

武侯祠廟南山曲苔滿荒碑不堪讀客子登臨又一時
秋色蒼蒼入喬木天下不可無奇才千載英爽安在哉
孤吟徘徊不忍去寒日欲下悲風來

題溫日觀葡萄次韻

王守仁

龍局失鑰十二重
驪珠迸落鮫人宮
鎖刀剪斷紫瓔珞
累累馬乳垂金風
樹根吹火照殘墨
冷雨松棚秋鬼哭
熊丸嚼碎流沙冰
鴨酒呼來漢江綠
鍊削蚪藤劍三尺
雷梭怒穴陶家壁
瞿曇卧起面秋岩
一索摩尼掛空壁
登那羅窟有感

真可

釋

君不見太樸未鑿混沌始
情與無情無彼此
瞥然一念
是誰生骨肉
山河成礙室
那羅窟甚深密
底裏空明不

可測見說神僧向入中雲邊千古遺包笠聞其風我亦
來幽岩感慨增徘徊自慚身見仍還在菩薩有門不為
開一直上莫分別凡聖都盧乾屎橛當頭若許著思量
石人腦後重加楔由是觀休外參眼聲耳色觸體寒常
光一片色非色乾坤攝取一毛端又不見維摩丈室十
笏許百千師座皆容處若言老漢弄神通分明瞋睡成
錯去這妙用孰不有喫飯穿衣記得否自是男兒不丈
夫超踔金毛變癡狗風吹草本非賊望影狺狺吠不息

及乎大盜劫主人煩惱刀鳴遂竄匿業酒醉何日醒碌碌浮華俱酩酊輕裘肥馬送時光愁殺相如多此病莫管他各管自沐猴性躁方痛治好惡關頭林木深上下何曾有定止鞭其後即回首叱去呼來不敢扭掌中繩索尚相持禪翁謾笑狂奴醜明道易履道難習水清潭豈易乾不是一番拚命做說時似悟用時瞞話到此淚如雨滴滴皆從肝腑出相逢罕遇箇中人愁人莫向愁人語既有苦必有甜陰盡陽回洞口乾閒來曝背解麻衲

寧知身在重巖間
夜來趣忘人情萬
里烟波海月生
設使侯王知此境
便教敝屣視功名

國朝

中條行

吳翹

君不見中條山陽城
昔日曾閉關
白衣徵起作諫議
脫屣就職無慙顏
月俸計口送酒媪
諫紙疊置空箱間
歌呼痛飲夜達旦
醉卧客懷不聽還
貞元奸佞不可當
白麻旦夕宣朝堂
忠臣延頸待誅僇
宰相帽伏眠如羊
中

條山人起伏閤延英門上飛風霜諫官叫天爭喧金
吾萬歲聲如雷延齡不相陸贄免奮臂坐使唐天回乃
知酩酊不言有深意務欲撥棄細碎爭崔嵬我過中條
山念君如宿昔君名長比條山雲君心尚似條山石一
代相知李鄴侯千年涕淚避賢驛思君不見可奈何酌
君一觥歌主客君不見長安碁局日紛紛著眼爭如局
外人若無衡嶽爐邊客誰向中條訪隱淪

贈馮訥生進士教授雲中

并州馮郎長吳越桐江風雪秦淮月不烹羊酪敵蓴羹
肯拈蘆管吹桃葉才同顧陸與溫邢俠少風流擅絕倫
名士有誰甘作諾大夫何必尚專城乞得一氍還故土
欲化邊人作鄒魯余笑謂君且歸去不信廣文今廣武
絳帳懸弓設豹侯講堂割肉摻鼙鼓擊磬新調塞上歌
投壺却奏軍中舞文籍先生上谷儒游閒公子河東賈
亂定初聞闕里鐘時清不用平城弩鴈門太守解將迎
馬邑名豪通訓詁烏桓年少挾雕弧射得黃羊供束脯

男兒作健羞裙屐拂雲堆上吹橫笛低頭博士為萬卷
撫掌封侯空四壁憶昔扁舟醉石頭別來幾夢南徐客
隱囊麈尾燒却盡長鈇純鉤看自惜學就吳趨恐未工
注成晉問無人識嗚呼五湖烟水憶鱸魚落水天高好
寄書塞鴈不歸花又發故人消息待何如

鴈門尚書行

并序

鴈門尚書行為大司馬白谷孫公作也公代州人地
故鴈門郡長身伉爽才武絕人其用秦兵也將憑巖

關為持久且固將吏心秦士大夫弗善也累檄趣之
戰不得已始出天淫雨糗糧不繼師大潰潼關陷獨
身橫刀衝賊陣以歿從騎俱散不能得其屍公之出也
自念必死顧語張夫人夫人曰丈夫報國耳無憂我
西安破率二女六妾沈於井揮其八歲兒以去兒踰
垣避賊墮民舍中有老翁者善衣食之二年公長子
世瑞重趺入秦得夫人屍貌如生老翁歸以弟相扶
還見者泣下蓋公素有德秦人云余門人馮君訥生

公同里人作潼關行紀其事余曾識公于朝因感賦
此什公死而天下事以去然其敗由起戰且大雨糧
絕此固天意抑本廟謨未可專以責公也公之叅佐
惟監軍道喬公以明經奏用能不負公潼關之破同
日死名元柱定襄人

鴈門尚書受專征登壇顧盼三軍驚身長八尺左右射
坐上咄叱風雲生家居絕塞愛死士一日費盡千黃金
讀書致身取將相關西鼠子方縱橫長安城頭揮羽扇

卧甲韜弓不忘戰持重能收壯士心沈幾好待先徒變
忽傳使者上都來夜半星馳馬流汗覆轍寧堪似往年
催軍還用松山箭尚書得詔初沈吟蹶起橫刀忽長嘆
我今不死非英雄古來得失誰由算椎牛誓衆出潼關
墟落蕭條轉餉難六月炎蒸驅萬馬二嶠風雨斷千山
雄心慷慨宵飛檄殺氣憑陵老據鞍掃穽謀成頻撫劍
量沙力盡為傳食尚書戰敗追兵急退守嚴關收潰卒
此地乘高足萬全只今天險嗟何及蟻聚蜂屯已入城

持矛瞋目呼狂賊戰馬嘶鳴失主歸橫尸撐距無能識
烏鳶啄肉北風寒寡鵠孤鸞不忍看願逐相公忠義死
一門恨血土化斑故園有子音書絕勾注烽烟路百盤
欲走雲中穿紫塞別尋奇道訪長安長安到日添悲哽
蒲足荆榛見胥井轆轤繩斷野苔生幾尺枯泉浸形影
永夜曾歸風露清經秋不化冰霜冷二女何年駕碧鸞
七姬無塚埋紅粉複壁藏兒定有無破巢窮鳥問將雛
時來作使千兵勢運去流離六尺孤傍人指點牽衣袂

相看一慟真吾弟，訣絕難為老母心。
護持始識遺民意，回首潼關廢壘高。
知公於此葬蓬蒿，沙沈白骨魂應在。
雨洗金瘡恨未消，渭水無情自東去。
殘鴉落日藍田樹，青史誰人哭薜碑。
赤眉銅馬知何處，嗚呼材官鐵騎看
如雲不降即走徒，紛紛尚書養士三十載。
一時同死何無人至今，唯說喬參軍。

英雄奇遇處

范鄆鼎

昔年曾過韓侯嶺，共道英雄遇不逢。
解衣推食上將軍。

須臾變作長樂鐘至今披讀扶風書腐儒但知怨荆通
極目南望咫尺許相傳英雄奇遇處西岳祠下位歷歷
土人春秋薦稷黍藥師初年未得志曾與虬髯共行旅
兼有楊門一侍婢合樽促坐呼爾汝寶貨泉貝當面擲
躡足附耳寂無語我讀唐書却手舞開卷便識韓擒虎
眼光直射物色外喜見今又一孫武本傳亦載楊素名
謙光未遑牀上迎當時英雄不短氣豈假紅粉添深情
北平西定土谷渾猶欲力疾報君恩帝憫其老心不許

忠肝義膽貽子孫臨淄鳳翔五世濟總有陳豨亦安存
梓州刺史推乃兄幽州都督推乃昆壘麓如雲心如雪
不聞邂逅訂友婚憑弔靈石地尚論古人風前有淮陰
侯後有衛國公遇與不遇雖差池居功可定兩英雄

徐溝道中

王綬

悠悠晉陽城行行二百里往來如蠅逐憂心隨河水三
年兩地無寸善一官學製類襪線朝廷課績名實分短
長何妨錯雜見羸騎逶迤出荒戍平林炊烟帶山暮寒

雲披野雨復來牛羊入村風簌簌君不見道上泥深三尺沒車輪淹馬脊秋蕭蕭涼颯逼日沈沈蛩音集馬蹄車輪不得停東嶠西嶠月長碧嗚呼人生周行何獨難勞吏掩關徒嘆息

李氏節孝詩

徐乾學

繭絲不作晉陽尹輪將却似譚大夫向余索詩表節孝
丞哉意不在簿書節母氏王孝子李閨門雍肅作楷模
受茲介福蓋有以永錫爾類良不誣前史作傳貴難能

髣面封股每書諸此事人之所易到實可風世而豈徒
君家髯兄東史筆記此有徵後代須吾詩不肯無為作
邑有風化丞自殊邑人及時相勸勉丞哉不久飛仙鳬

洞陽山

陳廷敬

我家太行盡處村蛟龍欲落留爪痕蜿蜒腹背故隆起
振鱗掉尾如雷奔波濤隱見吞萬壑似覽衆水窮河源
古稱上黨天下脊茲山拔地尤騰騫俯視砥柱一拳石
析城王屋雙栴樽頗訝大禹所經畫足跡未到回南轅

徑下河濟急疏瀹北顧參井高莫捫乃知龍性躍天漢
肯同蠃蚗尺水渾太行以南多峻山地勢愈下難並論
茲山何不列嶽鎮使我歎息增煩冤何為歎息增煩冤
萬古無害茲山尊

開元鐘

蒼茫陵谷開元寺古鐘猶帶開元字尋向桃花觀裏來
鐘聲依舊浮空翠此鐘流傳自後唐誰與作者李昭義
黃塵清水變須臾鬪雞小兒聊角戲昭義此時亦人傑

屹立孤城下無地夾寨重雲鳥不飛余吾殘營白晝閉
流矢拔足容不知血暗淋漓痛劈臂龍驤神捷等沙蟲
銘以蒲牢毋失墜生子當如李亞子進通忠孝先王識
我怪歐陽傳五代嗣昭特書多可紀當時亦有劉義叟
飄零頗恨文章蹟今我來觀開元鐘與客談詠梁唐事
更數百年歌者誰鐘聲未歇聞歎喟

自南村徑石院抵九仙臺

紅葉深紅與淺紅溼雲細雨如春濃桑柘半凋柳黃落

三里五里村村同徑轉溪開歎奇絕千山萬山皆玲瓏
誰令巖壑擅異色純以金碧施神工寒烟消歇亦變態
怪石磊砢還孤峰宇內名山亦無數此山如畫展毫素
我聞虞山最佳麗丹崖紺壁儼畫具一峰道人飛仙人
揮染平生釣游處浮嵐暖翠曉千里玉洞桃花春萬樹
仙人既去亦復還白雲黃鶴游人間清都渺渺在何許
玉階朝罷棲名山只今畫者誰其匹天高氣清風寥慄
欲攬太空為粉圖消得仙人兩三筆

雁門行

雁門關鴈不度關上長城高插天鴻鴈高飛從此去鴈
飛長城間遊子關門還鴈南君北向相望何由扳塞山
連緜秋雲起西度五原東遼水傳語幽并輕俠兒雄飛
雌伏休相疑

郭烈婦篇

邵嗣堯

郭家烈婦烈莫比和醢飲藥從夫死人生偕老亦尋常
烈婦死時十八耳三年侍藥瘳眉人一朝立作同穴鬼

人盡哀母且喜有女如此死足矣借問此女誰家兒陳氏外孫荆氏子

趙武靈王墓

馮雲驤

大漠蒼蒼山月小趙王墓枕青山老怪蝶隨風獵野花黃狐幾夜啼秋草昔時意氣何英雄遺俗能成蓋世功山川想像餘威在斷碣殘碑認烏蟲年年涼雨燐燈濕龍旗朝夜精靈集甲士黃雲帶劍來宮娥紅鬼詞筆立迢迢戍壘望飛樓七星掛城河漢流誰記舊遊歌舞地

珍珠埋盡野松愁
我來登臺獨懷古
一酹濁酒澆黃土
楓青寒黑古魂疑
悲吟弔君君豈知

潼關行弔大司馬孫白谷先生一門死節

趙三麒

朝行潼關道暮入潼關門
入門長嘆息嘆息弔忠魂
昔年旱魃長獫狁賊灌汴城
偏逢雨南川民社白骨流
北岸援師尚歌舞舞殘頓解
駕鴛鴦瓦血濺沙場千里
赭地折天崩可奈何
圜扉始起孫司馬司馬秉鉞
再登壇官軍復

見賊膽寒請纓再造中原易孤注誰知信主難信是養
癰如養虎猶道用勦不如撫司馬殲渠黑水頭端皇喜
捷武陵怒武陵何事速其辜時引太宗曾殺盧四正六
隅方水火薊北又乞分兵符援薊秦兵留不還司馬孤
軍出潼關郿縣一戰多恢復獲鎧破敵如摧山那期靈
雨庚癸呼廣恩仍附雞鳴徒癸未十月潼關陷奮臂拒
戰無完膚膚裂猶有罵賊齒磨頂鋸骨甘如旨天教碧
血壯山河差勝馬革裹千里妻女就義盡從容刑於閨

閣皆君子同難更有喬參軍一劍身輕掣海雲百年板
蕩幾男子肯將勁節輸湘裙關山仍舊水仍東惟有古
木多悲風忠魂義魄塞天地國破豈盡在蒼穹君不見
息壤一盟竟成功謗書一夾無兩聰又不見十二金牌
便賣國總有英雄難為力吁嗟乎豫讓請衣衣出血椎
中副車祖龍滅厲鬼真有殺賊才肯閻而今安在哉

送陶季之潞州

王士禎

先生昔日登武夷鐵船峰頭看奕棋中冠離支三百顆

酒酣自劈輕紅肌峰頭爛睡忘甲子坐笑曾孫生白髭
張帆伐鼓下黃鶴欲覽三湘窮九疑披襟蘭臺發高唱
快哉不辨風雄雌平生名岳屐齒遍風塵京雒嗟衣綈
投我奇文浩千頃蛟龍大澤纏躩踞謂我四海一知己
譬若莊休從惠施高齋茗飲坐清晝風爐活火分槍旗
我時無事似犀首酒鱗浮動銀留犁豐臺紅藥花照眼
驪駒忽告將西馳壯心猶作驥伏櫪適志無如泥曳龜
我聞上黨天下脊當年潛邱傳臨淄龍飛荒冢沒烟莽

斷碣髣髴開元祠紛紛梁晉夾河戰
鷄兒萬騎陳軍麾
錦囊負矢盛意氣歌聲慷慨留三垂
時平不用弓箭手
空老昭義千熊羅戰場下馬問亭長
鬼燐颯颯寒飈吹
君家草堂臨射陂門前五柳藏東籬
何時單舸徑歸去
北窻高枕談黃義

送吳天章歸中條山

月始在房羣陰終凍禽塌翅啼酸風
呂生置酒邀我飲
清歌笑倚商玲瓏朝來宿醒卧未析
吳郎告我歸河東

壯風雨雪滿天地層冰千里高穹窿行人戰瘁手指墮
狐裘嗟汝胡蒙茸長安甲第高入天馬蹄動地聲隆隆
漿酒臠肉不足道金玉磊砢堆堂中汝詩千首文百軸
滲漉未拔誰相通汝家王官谷中條青濛濛藤蘿相糾
水相激至今猿鳥悲司空汝歸讀書甘菽菰致君堯舜
會有日飛伏詎辨誰雌雄

賦趙廷舉事

孫枝蔚

崇禎五年季冬夜賊滿山西武鄉野悲風愁雲動千里

殺人之父城門下念賊亦是人之子胡不容人代父死
歸語我友及里中兒父仇不報子活何為願假我斧我
必刺之月黑雞鳴事不可遲親族向前相泣語百萬騎
中賊何處此賊胸前掛銅牌此賊秣馬在庭階諸君且
勿勸我住吾當畏聖賢不能畏彼虎與豺皇天憐孝復
憐勇須臾賊死不旋踵一賊既倒羣賊驚此兒何姓復
何名自言身是趙廷舉吾奏上帝當殲汝汝曹不孝復
不忠朝廷恩澤二百六十年中何忍負之彎汝弓況

復孤人之子烹若翁言畢投井井無水七尺吾當全歸
耳死後白氣上冲天孝義皇天亦潛然鄉人名為孝子
里聶政荆軻安足擬

學宮古栢行

許自俊

森森古栢幾千年虬根蟠地梢插天婆娑生意久愈旺
縱橫屈矗影翩跹五幹已逾五老壽三株直拍三神肩
為龍為蛟為虎豹疑鬼疑怪疑神仙將軍甲冑巍我我
丞相冠劍胡襪襪長眉瞿曇植其杖柱下老聃禿其顛

翳沐日兮更浴月爰欺霜兮復凌烟輪囷離奇違世用
樸拙率律態復妍雷霆霹靂不敢劫陰陽變化狀百千
唐與虞與秦漢與徘徊俯仰堪留連天濤風響生靈籟
直無一曲通黃泉吾聞間氣鍾人物物華宛似三晉賢
庇根垂蔭趙冬日水火不災縣上田為梁為棟羊舌氏
銅鞮伯華相並傳尼山鐘鼓籍清蔭禹貢栢神氣全
天下物老則曰酉徂來新甫閼宮篇

古栢歌

陸豹雲

麓臺山前新雨痕春郊芳草游王孫西南數里揮鞭去
川原明媚古胡村胡村田舍通長陌紺宇從隆古仙柏
天然一本五枝生十圍騰躍幾千尺蜿蜒蒼龍西倒垂
偃蹇俯枕泰和石洪荒既剖誰植來歷數周秦莫能白
彷彿疑有神靈集生死先期知興革飽經霜雪幾千秋
錯節盤根萬古愁食葉服脂真妙訣神仙何須滄海求
吾聞秦官漢秩爵長松此栢胡為不受封又聞孔子廟
前廿四株偶然砍伐直須臾物生浩劫有時數盤踞得

地無天殂太谷之栢應如此整襟肅穆澹容止主人坐
卧不欲歸為和新詩雜宮徵

郭林宗祠下觀傅青主鄭谷口重書蔡中郎二碑
歌用少陵李潮八分小篆歌韻 周在浚

軒頡文字不可見金石之刻飄殘雲劫灰之後若瓌寶
西漢以來珍八分歐趙當時已歎息後之寶者誰為真
太原傅山筆力健以意摹寫多丰神我友鄭八號稽古
秦碑漢碣身相親當時客都下硯山曾卜鄰石經遺字

數晨夕寢斯食斯如對當時人重為臨摹儼然相祠中
兩兩同西向波撇矯健俗書遠興來老腕休屈強中郎
之文無慚容谷口之字多雄壯千載萬載難磨宕傳鄭
今時李郭行我來坐其下摩娑還作歌碑乎碑乎從此
流傳歲月不可紀風風雨雨奈此貞珉何

介休道中大雪用歐公字體并次其韻

繇山翠律開蓮萼爾來怪底雲氣薄曉來鞚馬欲出戶
颯颯風聲忽大作蒼崖不復辨狐岐林宗祠前蒼寥廓

手縮難縮紫游韁目眩但覺光閃爍沿村沽酒苦酸澀
敲門乞火嗟冷落胡為歲歲勞行役老我不如邱中貉
聞道此邦春夏旱棄兒拋婦隨人搜道傍尚自多流亡
慘傷半似依人雀馬凍不前惟長嘶僕餓急走遺芒屨
忽逢年少披貂裘豪興但誇逐兔樂執手不暇問姓名
金盃行酒恣傾瀾擊鮮聊復慰老饕最喜乾坤歸淡漠
一時頓忘行路難掌熱儘堪握冰搨搖鞭我亦急馳去
回首相看各狂噓

虎祁宮故址

仇昌祚

老夫清晨過滄水馬鳴蕭蕭悲風起河干駐馬訪虎祁
但見千山萬山紫憶昔東周晉莫強諸侯聘問無時已
問罪之師數出境犧牲玉帛如敝屣宮成瞥見諸侯畔
吳強楚僭驕莫比斯虔趙籍擅侯封表裏山河竟若此
嗚呼繁華無限總銷亡古往今來事不常臨風太息復
何有荒原落日來牛羊

題寶岩寺

程之珩

花園村踞太行巔上有古刹栖枯禪入夜金燈往往出
乍明乍滅樹林邊觀燈佛子歸佛力自我思之恐不然
中土無佛山即有此燈燦爛幾千年非從白馬馱來物
不稽之語莫輕傳暇日偶看草木子謂燈皆是山靈宣
明珠一顆能潤浦良玉一片能輝田寶藏之興萃陵谷
自然光怪冲雲天峨嵋簡州衡嶽地匡廬天章太白前
到處有燈驚耳目豈皆天竺種奇緣儒者所言良不誑
霧釋冰消何惑焉鄴下崔生名下士流連景物題詩篇

才華俊逸但佞佛佛日豈借燈增妍我作此言告來者
讀書明理莫牽纏山歸山兮佛歸佛鑑朗衡平兩不偏

長平弔古

陳均揆

戰國於今歷有年長平之名邑乘傳戰士骷髏歸碧土
騷人憑弔問蒼天六王將畢四海一將不知兵國子敵
嗟吁四十萬人骨未冷甫傳二世秦鹿失人生天壽宰
於命國運延促力難競以秦為鑒不鑒秦八千子弟兵
徒勁

五老峯

王含光

虞鄉西南五老峯一峯一朵玉芙蓉層城亂插櫻桃樹
絕頂斜簷羅漢松中峯孤秀凌空起巖巖去天一握耳
四峯却立不敢前儼然商皓胡帝子羅列石筍似兒孫
或載雲旂騷騷駟我欲步虛叩僊囊絕巘蘿颺不可攀
但見流風吹素氣懸泉飛薄戛珮環玉竇穹嵌鐘乳滴
香雨溟濛非人間西過林坳登欹石道人指點羅公迹
柯爛丹成去不迴至今樵者聞流奕月照前峰雲影飛

相傳半是蓬萊客一壺春酒謝山靈空翠撲人衣帶青
野鶴歸來憐華表仙翁何處化流星恍惚不知歸路在
谿烟花樹雨冥冥

黃園洞歌

孫必振

黃園之山山谷口夾岸長林風怒吼曲磴嶙峋鳥道通
扶筇屢屢登緣陡峰迴路轉現琳宮老衲藏修時歲久
為言洞中別有天登探欲把塵襟抖洞口霏霏烟霧輕
莊嚴妙相當牕牖座後突兀說法臺寶塋玲瓏三五耦

石乳懸空滴蔗漿龍泉清冽嗽瓊玖四壁斑斕翡翠屏
鳳篆龍章雜蚪蚪石芝倒挂白鶴飛石脊蜿蜒蒼螭走
更有幽竒探不窮洪濛浩氣忘昏酉肅肅陰森衣袂涼
炎天六月歸何有游罷玉樓肌粟生幸有高人載斗酒
把杯長嘯響天風欲起何妨時被肘村農皓首喜相從
不減山陰五老叟魚烹蒸黍酌使君使君莫負攀枝手
秋來紅葉滿山隈乘興還思來再否

飲靈石署中即訂綿山看松

賈鳴璽

有客跨驢耽遠游聊且逢君一醉耳汾聲作意雜笙歌
東山西山酒杯裏三更燒燭說看松松樹未見松濤起
西風吹散萬里雲叫出明月涼如水

過冷泉關

沈廉

河山莽蒼蟠龍起銀濤寒噴關門底樹禿烟消烏影稀
荒雲零亂殘陽裏三年攬轡往來頻如弩西風吹倒人
茫茫北控并州路此地誰言非要津

登馬鞍山

高垣雲

雙峰屹聳聳雲間俯視千山與萬山層嵐翠壁凌霄漢
恍疑天馬下塵寰太行北來多奇賞五龍發鳩雄上黨
獅子韓國本獍狴黎水艷稱白巖蟒乃有駿骨丰稜起
騰驤何必日千里稽古負圖出河中腰裏嘗從穆天子
不數秦家鐵駟羣漢時得之渥洼水無端誤值太行車
矯首頓足長嗟吁孫陽一顧空冀北攬轡躍躍入雲衢
於今皇路正昇平大展逸足任所行圉人安得施閑絀
始信當年伏櫪心君不見雲錦韉玉華駿具眼誰不羨

游龍誇奔電逐遺風霜蹄不數汗血紅紫燕青騅拳毛
騮金鞭玉勒重天家雍雍待漏立天仗烽火驚人踏風
沙練光照曜空千古千騎萬乘何足數不信試看馬鞍
山依然驂駟駉駉譜

樂府

周 琴歌

風俗通曰百里奚為秦相堂上樂作所賃潯婦自言
知音因援琴撫絃而歌問之乃其故妻還為夫婦也

亦謂之炭屨歌

百里奚五羊皮憶別時烹伏雌炊炭屨今日富貴忘我
為

百里奚初娶我時五羊皮臨當別時烹乳雞今適富
貴忘我為

百里奚百里奚母已死葬南溪墳以瓦覆以柴春黃藜
搯伏雞西入秦五羖皮今日富貴捐我為

河激歌

列女傳曰女娟者趙河津吏之女也簡子南擊楚津吏醉卧不能渡簡子怒欲殺之娟懼持楫走前曰願以微軀易父之死簡子遂釋不誅將渡用楫者少一人娟攘拳操楫而請簡子遂與渡中流為簡子發河激之歌簡子歸納為夫人

升彼河兮而觀清水揚波兮冒冥冥禱求福兮醉不醒
誅將加兮妾心驚罰既釋兮瀆乃清妾持楫兮操其維
蛟龍助兮主將歸呼來權兮行勿疑

鼓琴歌

史記趙武靈王夢見處女鼓琴而歌此詩異日王飲
酒樂數言所夢想見其狀吳廣聞之因夫人而內其
女娃嬴孟姚也孟姚甚有寵於王是為惠后
美人熒熒兮顏若茗之榮命乎命乎曾無我嬴

漢

鮑司隸歌

列異傳云鮑宣宣子永永子昱三世皆為司隸而乘

一驄馬京師人歌之

鮑氏驄三入司隸再入公馬雖瘦行步工

上郡歌

漢書曰成帝時馮野王為上郡太守其後弟立亦自
五原太守徙西河上郡立居職公廉治行略與野王
相似而多知有恩貸好為條教吏民嘉美野王立相
代為太守歌之曰

大馮君小馮君兄弟繼踵相因循聰明賢知惠吏民政

如魯衛德化鈞周公康叔猶二君

別歌

李陵

漢書曰昭帝即位數年匈奴與漢和親漢使求蘇武等單于許武還李陵置酒賀武曰異域之人一別長絕因起舞而歌泣下數行遂與武決

徑萬里兮度沙漠為君將兮奮匈奴路窮絕兮矢刃摧士衆滅兮名已隕老母已死雖欲報恩將安歸

唐

故絳行

杜頴

君不見銅鞮觀數里城池已蕪漫君不見虎祁宮幾重
臺榭亦微濛介馬兵車全盛時歌童舞女妖艷姿一代
繁華皆共絕九原唯望塚累累

履霜操

琴操曰尹吉甫子伯奇無罪為母讒而見逐乃集芟
荷為衣採梓花為食晨朝履霜自傷見放援琴鼓之
而作此操

履朝霜兮採晨寒考不明其心兮聽讒言孤息別離兮
摧肺肝何辜皇天兮遭斯愆痛沒不同兮恩有偏誰能
流顧兮知我冤

履霜操

韓愈

尹吉甫子伯奇無罪為後母譖而見逐自傷作

父兮兒寒母兮兒饑兒罪當笞逐兒何為兒在中野以
宿以處四無人聲誰與兒語兒寒何衣兒饑何食兒行
於野履霜以足母生衆兒有母憐之獨無母憐兒寧不

悲

元

履霜操

并序

楊維禎

琴操有履霜謂尹吉甫子伯奇為後母譖而見逐自傷而作也其詞曰朝履霜兮採晨寒考不明其心兮信讒言何辜皇天兮遭斯讐痛歿不同兮恩有偏誰說碩兮知此冤使是詞果出伯奇則伯奇不得希於舜矣予為之補云

霜鮮鮮兮草芟芟兒獨履兮兒宿野田衣荷之葉兮葉
易穿採掇花以為食兮食不下咽嗟兒天父兮天胡有
偏我不父順兮寧不兒憐履晨霜兮泣吾天

明妃曲

劉因

初聞丹青寫明眸明妃私喜六宮羞再聞北使選絕色
六宮無慮明妃愁妾身只有愁可必萬里今從漢宮出
悔不別君未識時免使君心憐玉質君心有憂在遠方
但恨妾身是女郎飛鴻不解琵琶語祇帶離愁歸故鄉

故鄉休嗟妾薄命此身雖死君恩重來時無數後宮花
明日飄零成底用宮花無用妾如何傳去哀絃幽思多
君王要聽新聲譜為譜高皇猛士歌

明

智伯頭飲器歌

唐肅

飲伯頭些伯已鬼伯死寧知頭作器玉盤酒滴猩猩紅
血波倒浸泥丸宮雷吼無聲電睛墜伏犀骨斷漆花膩
老龍一吸銀海澁飲闌擲梧怒髮立英魂夜半不敢泣

君不見君漆頭臣漆身恨君蘭臺爭諫臣

傅巖操

袁凱

日之將出兮余趨乎築之所杵丁丁而不息兮汗淫淫
之如雨日既入而始休兮飯糲糲而不飽叶補嗚呼其命
兮余何辭乎此苦

靳老雄

宋濂

擬宋饒歌昭義節度使李鈞據澤潞弗服上御六師
平之為靳老雄

斯老雄雄勢蹙連寇師樹高靈襲邊城施萬毒王赫斯
怒勢如戮百萬貌貅若林轟行視礁峽勝平陸升城齊
呼山岳覆飛矢貫臂拔其鏃雄斯窮畀炎燬朱鳥鳴反
舌縮反舌縮四海服

雲中兩烈婦

錢宰

竹貞鎮雲中縱游兵掠鄉鄙張思孝妻華氏偕子婦
劉罵賊死之作雲中兩烈婦

雲中兩烈婦風節何雄哉婦姑誓同死軍馬倏已來姑

言我死命之遭爾方年少不得逃欲自經不得索欲自
刎不得刀少婦潛致詞不用刀與索兒當激賊怒婦姑
頭共斫姑如湛盧劍罵賊獵獵生剛風婦如黃間弩蹶
張放弦氣愈雄厲聲奮激膺賊鋒萬古雙烈夸雲中

國士行

李東陽

漆為癘炭為啞彼國士何為者趙家飲器智家頭一日
事作千年仇報君仇為君死斬仇之衣仇魄褫臣身則
亡心已矣

漢壽侯

漢壽侯義且武冠三軍振華夏

叶

斬仇將報知者

叶身

不可留臣有主老瞞不追猶有度誰其仇者吳陸呂歲

十二月侯出走

叶

吳人縛侯生縛虎生縛虎死猶怒髯

如虬眼如炬吁嗟漢乎天不祚有馬不踐中原土侯身

雖亡神萬古

睢陽歎

將軍有齒嚼欲碎將軍有背血成淚生為將星死為厲

盡是山川不平氣二人同心金不利天與一城為國蔽
強兵坐擁瞋相視孝子忠臣竟誰是千載功名亦天意
君不見河南節度三日至

馮婕妤

園門晝開熊不守婕妤當前衆嬪走荷君光寵捍君危
不然安用賤妾為君身如山妾如葉君有不虞安置妾
亦知倉卒非賈恩恩多妒深翻在睫昔非勇今非怯掖
庭佞兒何喋喋

繇山怨

五蛇上天一蛇蟄繇山經月火不滅君侯恩重翻為仇
不如放作山中囚君侯有臣亦非少貪天之徒但不保
臣心見母不見君誰言母死非君恩今辰何辰夕何夕
晉與千年作寒食

上殿熊

石瑤

熊上殿昭儀趨誰其當者馮婕妤玉顏豈能編虎鬚不
難一死遮乘輿孟陽登牀信誑楚亦有華泉逢丑父分

明造次效忠貞
宣意嬋媛成錯
迕傳姬手持黃
紙來昔何勇銳
今何衰兩朝淚
濕黃金堦宮中
妒色亦妒才

鴈門太守行

何景明

壘壘高山莽莽代
谷城邊風起沙
漠漠城內惟聞
秦羌樂太守下車
買牛息戈陶民
禮義朝絃暮歌
北歷黃沙磧南遊
白草原五馬何
秩秩朱英導文
軒嗟哉太守亦
孔武時時較獵
西山下

國士行

漆身為厲吞炭為啞更名入宮廁變形伏橋下雖不褻
讐魄猶得斬讐衣生有國士名死為壯士哀

張節婦歌

王九思

節婦陶氏者大司馬逸菴公之女也夫亡乃不食死
予聞而異之為作此歌

威鳳死丹穴孤凰寧獨生不飲不啄餒即滅長與威鳳
遊紫冥吁嗟孤凰爾雖逝遺雛落落風雲氣千百萬年
名在世

乾陵歌

武后陵黃巢發之事具雪航膚見

李夢陽

九重之城雙闕峙前有無字碑突兀雲霄裏相傳翁仲
化作精黃昏下山人不行踪人田禾食牛豕強弩射之
妖亦死至今剝落臨道傍大者虎馬小者羊問此誰者
陵石立山崔嵬銅鐵銅重泉銀海中縈洄巢也信力何
由開君不見金棺玉匣出人世薔薇冷面飛塵埃百年
枯骨且不保婦人立身何草草

樹中餓

山深雪寒路坎坷兩死何如一生可桃才自信不如哀
君若有功何必我楚王好士得燕才燕家未築黃金臺
當時周室何為哉吁嗟乎樹中餓死安足惜何似西山
採薇食

師曠歌二首

元鶴歌

宮筵肆兮哀絃拊元鶴降兮鳴且舞呼烟侶兮嘯雲友
誰能為此師曠子

白雲歌

招白雲兮會天鬼
雨冥冥兮風不止
君好音兮徒自苦
民悲嗟兮離棄女

鴈門太守行

鴈門太守汝何人
治邦三月稱神明
我有牛羊賊不來
掠我有禾黍人不敢割
昔我無衣今有袴
著我思禮拜
太守太守不見憐
但聞太守身姓邊
紫髯廣額聳兩顙
太守出門四牡騤
騤後擁阜蓋前道
兩麾行者盡辟易


居者不敢窺旁問太守胡所之云訪城南皇甫規

古別離

劉雲瓊

趙禍妻

牽衣惜郎別郎上雕鞍去試問將何之東流汾水處



山西通志卷二百二十二